

TNC5236.5/2107 (11)



11

46416

10110

聖天子於天下家務勞大矣矣其於天下之

乞致仕表

蘇子由

七十致仕固有舊章再三上聞情極重歸中則次無臣早應致仕
才本空疎地依交通心存此又年方未及五積閱官者即當休
求謝事陛下於前古舊時臣與帝許事使名空歸仙相臣亦
信事難于同時勉強來進頃此深春空虛學侍已使三年何
足所酬明友故欲獲伴之舊力焉藉藉之餘美陛下欲使
臣而臣之蒙賜已久臣荷恩過滿益而陛下之流澤愈多感
一則清養之虞遂有於身而求之則處此未克得以日來伏
皇帝陛下賜物知大愛人以德君臣之辭恭備以辭恭養為
進退之周則所以名節始終為善誠使臣得進天間其亦不
行善於年中之受清神免其窮之患則私心自足何敢言

聖宋名賢五百家播芳大全文粹卷二十

陳乞表

乞致仕表

蘇子由

七十致仕國有舊章再三上聞情非虛飾中謝伏念臣早塵顯仕才本空疎晚依至道心存止足年方未及亟請閑官老即當休即求謝事陛下矜憐耆舊特屈典常許帶使名坐臨仙館臣眷戀德澤難于固辭勉強哀遜領此深眷空糜厚祿已復三年仰愧朝廷俯慚朋友敢緣禮律之舊力丐筋骸之餘蓋陛下欲優容老臣而臣之蒙賜已久臣將畏避滿溢而陛下之流澤愈多誠恐一朝海壑之虞遂有終身負乘之恥逮此未耄得以自陳伏惟皇帝陛下成物如天愛人以德君臣之際非獨以爵祿養為恩進退之間固將以名節始終為意識使臣得退伏閭里歌詠聖時行葦無牛羊之憂蒲柳免風霜之患則私心自得國體兼存區區

烟誠寔冀得請



乞致仕表

老而求退豈以為名病而得閑本其至願飛章自乞誠意未孚特蒙賜書勉以就職中謝臣聞引年去位事君之舊章懷祿忘歸人臣之深戒自昔不得謝者在禮雖或許之然皆廟堂注意之臣疆場折衝之任邦家倚以為重神人賴以為安留之者既自有詞居之者誠亦無愧是以禮存權制人絕間言未聞退處閑官坐糜厚祿竊以異數晏然偷安伏念臣早事三朝晚遭興運首被棟擇與聞幾微貪戀聖明豈有窮已徒以寵祿盈滿懼速顛隳筋力衰疲理難勉強幸緣舊典敢固自陳伏惟 皇帝陛下量極乾坤德隆父母因至誠之勤請杜無名之誤思念臣平生粗守庶隅耻于僥倖使臣今日得安分限即是恩私區區寸誠得請乃已

乞致仕表

誠發于中一言可信思加望外再請未從願惟衰朽之年久窈尊榮之寄雖蒙異眷敢以自安中謝臣聞事君之禮少壯不敢不勉

東武劉氏嘉蔭後宋本校鈔

行已之義老病不可不歸壯而不勉則失忠老而不歸則忘耻今臣心力衰退手足支離謝事之期已逾三歲訴天之請益又累年况復同列之間比多得請而去獨臣言辭淺陋未足以回天勢力孤单中無與為地苟遂盤桓願寵俯仰懷慚志不克伸沒有遺恨伏惟 皇帝陛下至誠樂善多士克生元首股肱自足名世奔走先後未嘗乏人豈臣去留足為輕重徒以遺簪可念遂忘朽弊之難堪老馬尚存不知馳驅之不逮致之顛覆之地恐非愛惜之宜故寵臣以尊名不若使臣得全庶耻之為貴厚臣以厚祿不若使臣得守分限之為安凡願保全之餘斯皆聖明之賜力陳危懇尚冀必從

乞致仕表

歐陽永叔

再貢封章乞從致仕伏奉詔書宜不允者竊稽典禮退止一辭止躡睿慈臣今三請雖未忍弃捐之意曲煩再諭以丁寧而不勝迫切之誠尚冀終蒙于開可中謝伏念臣稟生至陋力學不强徒以

略誦仁義之言粗知廉耻之節早緣一藝擢自諸生智非先見之
明才無通用之敏但知報國不敢謀生惟枉尋直尺之不為政圓
鑿方枘而難合以致被侵凌于羣小遭詆毀之百端而臣忍辱強
顏踰時歷歲蓋思責任之方重頌于去就而難輕今者幸蒙寬恩
獲保孤拙脫于死地復以便蕃既無功于勤勞徒坐尸于寵祿加
以艱危備歷憂患尤多老將疾以借來形與神而盡瘁昔而少健
黔驢之伎已殫今也病衰駑馬之力難強始露肺肝之懇乞收骸
骨而歸迹臣前後之心可見遲徊之久不敢為于妄舉蓋幸莫于
必從伏望 皇帝陛下推天地之仁垂日月之照察臣既非捐憤
以肆一朝之忿又匪矯激而希高世之名本由多難之餘誠以不
能而止矜其朽憊賜以哀憐許上印章退居田里使病瘳瘵腫盡
爾天年斤鷄逍遙遂其物性幸克成于素志惟仰賴于鴻私

乞致仕表

上恩曲諭已至矣而丁寧下愚勿移但頑然而迷復論罪合當于

東武劉氏嘉蔭後宋本校鈔

誅戮原情尚莫于矜從中謝伏念臣以空言少寔之文守泥古不
通之學適逢享會玷竊寵靈祿利已豐乃僻陳力恩私未報輒敢
便身推是以言因難逃責若乃累危險陷僅存將盡之餘齡沮辱
摧傷無復平生之壯氣加以形骸衰頹疾病侵凌頹雖戀于軒裳
遂退甘于畎畝語其此志又若可哀自申五請之勤已涉三時之
頃天慈惻隱聖度優容謂駑馬雖疲願伏轅之已久而遺簪至賤
念舊容而不忘臣當上醉至仁勉安厥位而夏秋交際痾疹日增
弱脛零丁惟存骨立昏矇眊瞽常若冥行未知痊損之期當廢去
苟遂退休之懇尚竊表名是敢更殫悃幅之私冀動高明之聽
伏望 皇帝陛下推乾坤覆載之私廣日月照臨之光少寬屢黷
之刑俯徇至誠之德庶使戒滿盈而歸止免灾疾以全生老安治
世之和永荷終身之賜

乞致仕表

歐陽永叔

恩深煦軀感極涕洟雖情有迫于危心不知自止而辭已窮于累

續幾至無言惟以至誠期于必達自乞憐于君父不復信于蒼龜
中謝伏念臣家世單平性姿中下少從官學本免飢寒不自意于
遭逢遂進階于華顯然而羣材方茂蒲柳未秋而早哀衆駭並馳
駕駘中道而先之而况荷難勝之任用竊踰分之寵榮風波憂畏
而慮已深疾病侵凌而老亦至故自辭于機政即願謝于軒裳蒙
上聖之至仁念三朝之舊物每曲煩于訓諭久未忍于弃捐竊惟
臣之事君必本忠信言不顧行是為固欺而臣口日誦于田閭身
坐貪于祿利可畏至公之議何施有醜之顏每自省循莫違啓處
是敢固避再三之煩瀆猶希萬一之矜從伏望 皇帝陛下特軫
天慈俯回睿聽察前言之可復蓋屢請者有年哀下愚之不移俾
卒成于素志徇其素志乞以殘骸臣若得上還印綬于有司自駕
柴車而就路晚節知无于大過没身永荷于鴻私

乞致仕表

晁之道

負罪竊食深愧大恩綠衰乞骸仰干洪造願天涯懇跼地汗顏臣

東武劉氏嘉蔭錄宋本校鈔

中謝伏念臣拙疎無他孤陋自守賴先世之緒業荷累聖之寵知
誤國使令甘心殞越咎已深而猶貸斥不遠而遠歸仍玷宮祠薦
還官秩省分悉踰于志願隕身莫報于生成與綠愛物之心遂露
挂冠之請敢自忘于罪戾寔終待于恩憐伏望 皇帝陛下憫惻
厄殘照知悃幅及未填于溝壑俾獲返于邱園死節捐驅悵慙素
志酣歌擊壤欣餞華顛乞特許臣守本官致仕

乞致仕表代

晁之道

仕當知止賢哲之所共繇思有匪頌古今以為至寵敢按禮典盡
布懇誠中謝伏念臣遭世盛明脫身寵陋朕勞四紀受寵五朝任
每過而食浮志雖勤而効寡久玷遺老積漸誤恩故自累歲以來
頻露引年之請至親灑于宸翰示曲加于眷慈謂雖粉骨以莫酬
夫豈乞骸之可必仰會聖世又閱暮年愈羞克壯之猷空忝居留
之任矧已愆于旅力猶分秉于節旄揆非所宜去乃為稱伏望
皇帝陛下載眷遲暮遂俾退休既獲解組之私仍免誇朝之恥生

無後咎沒有餘榮終愧大恩不踐累尸之志勉尋舊學尚追擊壤之歌

乞致仕表

忱辭已竭淵聽未回謂據經而可言敢呼天而力請自忘進越蓋侍哀矜中謝伏念臣器淺才疎力衰齒豁階嘗陞于一品報卒之于万分載典鑰于北門就秉旌于南土但經歲月終愧寵靈雖天地至恩未忍捐弃而桑榆暮景止合退休老益慕君病難報國惟有以時乞身而去庶幾不累知人之明矧疲薊之有加覺顛濟之必至冀能遠耻非敢近名伏望 皇帝陛下覆以慈仁慈其哀謝未及填于溝壑俾獲返于田廬餘生幾何皆上所賜固慙疎傳豈敢竊大夫之賢自此華封猶能祝聖人之壽

乞致仕表

趙承之

事君以忠豈致身之足吝不能者止懼陳力以難勝矧當覈寔之朝敢發省躬之義輒輸懇至仰控高明中謝伏念臣起自諸生素

東武劉氏嘉蔭錄宋本校鈔

无他技荷累朝之眷遇歷數紀以馳驅先帝擢于稠人待以國士陛下收之末路寔彼從官第勤夙夜之勞曾之涓塵之補鄉分符于嶺嶠寔寄命于炎歟因冒瘴氛遂嬰首疾疹已泣于歲序事嘗簡于天聰自膺出戍之行屢屬沉痾之疾時中瞑眩詎保顛危雖勉強朝昏僅未墮于職守而叨逾寵祿懼愈速于災殃敢援戒得之規用布乞身之請伏望 皇帝陛下天慈博愛聖度曲全憐其命分之奇窮迫以年齡之晚暮許上印綬聽歸里閭庶免帷蓋之仁少偈桑榆之景鳴鐘戒旦勉貽請于宴行故里言歸尚叨榮于畫錦

乞致仕表

劉莘老

近上封章願還官政伏奉訓敕未賜允俞者忱辭冒蓋貢搗分以宜休溫詔發中尚推仁于不忍荷眷私之特厚嗟感涕以無從瀆罔避于再三情真殫于万下中謝伏念臣生惟孤介性寔顯愚請書妄意于功名委質幸逢于際會誤被恩榮之若此所宜報稱以

何如故奔走于四方未嘗避事雖典司于內史不敢辭難明主既
亮其朴忠衆議頗推其強力况此邊隅之久晏偶當年穀之屢豐
在人情可偷安于官事粗能塞責徒以年既老而將耄病得衰日
而更侵顧差劇以難常宣安全之可待與其誤驅勞于緩急無所
辭誅曷若保進退于初終自謀引去及未填溝壑之際願得賜骸
骨而歸仰冀聖慈俯從入欵伏望 皇帝陛下曲矜舊物洞照丹
誠憐其奉事頗勤幸无臯盤憫其筋力雖強非有覬覦俾獲謝于
歲時庶克全于晚節華山歸馬豈無戀于華軒靈沼游魚尚永依
于至德

乞恩澤表

宋子京

四華禁從逢聖誕期輒丐餘榮更延殘息中謝伏念臣有男試將
作監主簿定國久踰冠齒粗習儒猷向因臣兄以猶子之親得參
士食逮臣蒙持橐之列已及蔭條願緣試秩之初未齒為真之籍
敢因歲節就冀成恩庶獎雅衆益敦義教省身可勉收報為期

東武劉氏嘉蔭後宋本校鈔

乞恩澤表

宋子京

籍塵祕禁身託近藩天纒在辰職來預慶緣從官之舊比有任子
之公條輒思覲顏更申妄請竊以臣男彥國南當蒙孺粗訓義方
未專一業之勤遽覲十齡之盛不能自達庸丐賞延幸當朝需之
卑冀預士名之食倘榮于嗣獲寵而家願交勵于朴忠得參酌于
覆育丹愚所望殞踣無忘

乞異姓恩澤表

幸班禁近獲蓬光華凡再待于明裡得推恩于異姓敢援新制以
寵私閔伏念臣有舅進士朱某幼習藝文世承綏冕未預鄉華之
薦久懷家食之慙以臣永嘆渭陽希榮母黨願筮仕塗之籍以光
孝治之辰誓罄涓埃共期酌補

遺表

曾子固

大馬之質難駐于頽齡日月之光尚攀于愛景中謝伏念臣出于
悴族進以謏材文詞講說制策之科衆稱華選儒館掖垣絳帷之

職世謂清塗獨徧竊于美名蓋親逢于亨運至于總銓衡之要劇
領京邑之浩煩曷有勞能可論報稱冒寵靈而過厚致災疾以交
攻迫霜露之所侵且將漸盡幸髮膚之無毀得以全歸才去闕庭
長投泉壤輒陳遺志猶及能言伏願 皇帝陛下御六氣之和慎
調興止享萬年之祚永庇華夷再念臣偷殘息之僅存覲餘恩之
可丐敢祈仁眷終賜矜憐臣有男進士崑孫男某親堂弟茂共出
寒鄉稍親薄技封菲不棄倘微祿之獲霑魚菽可供庶游視之未
餒伏望 聖慈並于文資內安排妄茲干澤愧在忘庶保存歿之
孤蹤託始終之大賜生而無益曾莫及于銜環死或有知猶庶幾
于結草

遺表

蘇子由

衰病既侵大期將至顧視日景瞻戀聖時忍死一言瞑目無恨中
謝伏念臣少年感慕有志功名晚節遭逢屢經驅策揔戎西北方
朝廷旰食之秋為國威懷竊將即分憂之日誓將勉勵少答恩私

東武劉氏嘉蔭後宋本校鈔

而花設未遑罪戾隨至荷聖神之普照曾竄迹之幾時安居里閭
浪迹漁釣誠心自信冀天日之尚回歲月潛移謂俯伏之可待而
命之勿予冥不自知俛仰之間彌留已甚伏惟 皇帝陛下躬堯
舜之明哲復漢唐之緒餘引領太平之功側身同德之士臣雖切
見其始而莫究其終興言及茲銜痛沒地然臣聞之惟至誠可以
格物惟至仁可以安人刑非為治之先兵實不祥之器此皆 陛
下聰明之自得老生平昔之常設將死之言庶幾于善苟有取于
萬一則雖沒而猶生

遺表代

黃魯直

依日月之末光未殫報國唱秦榆之晚景忽慟窮途輒輸將死之
言儻動蓋高之德 中謝伏念臣生長孤外過逢聖明學淺而智卑
才拙而用少先皇帝擢收流落前枝塵泥擢登清禁之班許以經
遠之器二聖臨御四門穆清無補涓埃薦蒙轡策長地官術不足
以富國丞相史志不足以回天少寬素食之憂得備維藩之寄重

分虎節出拊方州雖受命即行驅馳夙駕而短生无祿殞越路隅
猶結戀于清時敢獻忠于未暝伏願 皇帝陛下尊事耆老延登
俊良緝熙六藝之光明靈承七廟之謨烈盡子道以法舜之孝即
天常以體堯之文國家膺元疆之休微臣糝沒齒之憾

遺表代

汪彥章

死生猶夜旦之常理之必至大馬受蓋惟之賜恩則長絳假續息
之須臾貢芻言于咫尺臣中謝伏念臣起家一介委質五朝道君
擢氣機衡去國坐逾于一紀淵聖收還廊廟冒恩僅及于半年由
經世之才疎故在廷之日鮮昨屬裔謀之夷夏適當公輔之無人
誤辱延登俾圖康濟運籌決勝安知先物之幾覆餗興災果致妨
賢之咎會真人之起鄙陪多士以興周纔望清光即膺煩使莫桑
榆之晚景輸塵露之微勞而臣力與願違衰將疾至不圖交印之
始已困負薪之憂今則脉邊瀋沉氣將漸盡莫扈征遠之役徒懷
城郭之忠伏望 皇帝陛下據舊鑒新宅中圖大克勤克儉用祖

東武劉氏嘉蔭篋宋本校鈔

宗可父之規作福作威合中外至公之論練菟卒乘褒禮忠良上
以迎二聖之還下以正四夷之守臣報恩已矣戀闕潛然走仲達
于涓濱雖非所及亢杜回于輔氏猶或可為

遺表

晁之道

數必有盡又安足悲忠則无窮敢不自力暫駐已頽之力勉陳將
死之言中謝伏念臣奮起諸生遭過熙旦備陳委使進服清華迭
分摠于師干屢往城于境上綿薄雖慚于報効聖明獨亮其朴忠
心隨力殫老将疾至莫因閑局漸息沉疴旋被眷私特加命呂即
欲扶持朽質瞻望威顏而臣寵祿滿盈災疾崇降浸趨危治已極
膏肓存愧深恩沒懷餘恨猶貪戀于聖世願傾竭于愚誠伏望
皇帝陛下益廣舜聰祗循堯道日勤庶政以圖治時忘萬事而嗇
神永保黎元均蒙福祉臣今指期待化假息陳辭即萬鬼以為隣
嶺九天而永訣長負累尸之志徒傾結草之心

遺表

死生大矣方秉化以長辭君親臨之尚呼天而永訣力駐已頽之
景勉陳將死之言中謝伏念臣學不通方才非適用荷累聖之眷
獎躡處高華迹一門之寵光最為逾過伏蒙 皇帝陛下念神考
誤知之遺意記先臣盡節之往勤超先時髦陪預初政力雖殫于
駕蹇愚自抵于謹訂迄蒙貸物之慈獲遂首邱之志寵臨既溢災
疾薦臻頌未酬于邱山猶有莫于葑石而逝波不返知難戀于明
時餘息猶存願少輸于危懼伏望 皇帝陛下益觀成憲永御泰
和畢未萬國之歡心並受三靈之繁祉每念功于先世因知惠于
曩愆臣負累沒身感恩入地生固無益志已愧于捐軀死如有知
忠尚圖于結草

遺表代劉寶學

胡明仲

臣某言生也有涯孰逃定教世而不朽難改前脩獨餘垂盡之忠
仰願蓋高之聽中謝伏念臣蚤覩世賞浸歷仕途作屬外臺入丞
卿寺偶鎮府上扞城之代于機司叨中祕之嚴繼竊使華俄丁家

東武劉氏嘉蔭錄宋本校鈔

難值神武中興于丕祚而師于初試于邊庭世歷艱虞家傳忠義
忘意功名之際會不虞材略之畀凡祗赴詔音亟聞除命坐設將
幕曾無虎豹之韜攝事帥藩寧有鸞鵠之陣盡瘁謬輸于筋力論
功茂著于毫毛投竄是宜甄淑未替出駕輶車而撫士歸分符竹以
臨民尋從祠館之便安擢付江壖之要重疏滌汗還綴甘泉而
臣識昧遠猷器慚大受與時寡偶造事多窮推擠頻噴于煩言保
庇盡歸于全度雖幸家庭之逸敢忘軒陛之思尚冀駕駘或堪策
勵詎知蒲柳頓迫風霜頽靈劑以何施悲逝川而莫返將捐朽質
勉貢善言伏望 皇帝並日照臨俾天覆燾持守盈成之治柔能
遠迎之情變太和于穆清措羣品于熙晏大觀在上永隆不拔之
基與物為春坐享無疆之歷臣委身厚夜絕望穹宸抱司寇之紳
不能下拜寢大夫之簪獲以正終

遺表

張安國

數莫逃于生死竟欲何言思未報于君親沒有餘責忍湏臾之殘

息聲激切之遺哀目斷而視且將離泣盡而血无以繼臣中謝伏
念臣奮身孤外逢世休明蚤竊讀于父書妄學于君祿命鄉論
秀不自意于先登射策決科乃首蒙于親擢遭時宰之冒疾逮臣
父以排擠保全皆太上之恩簡拔出諸臣之右惟時英俊尚或沉
于下僚顧非賢能獨不待于次舉初典校于中祕俄寓直于西清
曾魯魚亥豕之未分何草創潤色之能稱在廷之日雖解許國之
心則堅多叔箕斗之虛名浸誤冕旒之隆眷一麾出守敢言宣力
于藩條三折知醫因頗究心于民瘼纔十更于歲律凡六易于守
符近由江浙之間遠若河湘之外南薄桂海北臨荊州間寄匪輕
輒環幾徧雖無問馬及羊之智鈎致名聲而有帶牛佩犢之風粗
宣條教方審陛下大有為之日安有人臣不能成之功實欲許
以驅馳庶少裨于經理不然退安于田野猶將終養于庭闈竟嗟
忠孝之難全竊悼聲名之俱隕良田材疎意廣福過災生未容解
免于人非固已難逃于鬼責視景曾桑榆之未遇望秋猶蒲柳之

東武劉氏嘉蔭錄宋本校鈔

先零僅諧吸菽之歡乃困負薪之疾既危懼之已甚猶洞泄以无
時氣屬續以少延手封章以冒貢伏望 皇帝陛下祇循堯道益
廣舜聰務得賢以立太平之基因啟民而躋仁壽之域更徐審于
上策以无忘于中原思祖宗如在之靈永社稷无疆之福臣今齋
志以亡没忍銜恨而不言更餘結草之忠誓圖報効无復採蘭之
養終冀哀矜

遺表

張安國

大化不留已悟有生之幻鴻恩未報敢忘忍死之言輒申犬馬之
情仰瀆高明之聽伏念臣早從疎陋出際休明被遇三朝服勞二
紀但知守古人難行之學不能為世俗通用之文才既乏于寸長
道寔恐于遠泥然叨塵法從謬掌宸綸屢易郡符久閑祠齋願便
安而竊祿宜盈滿以興災果膺疾于瘡瘍莫遑安于葯石日暮途
遠難駐景于須臾事與願違冀陳忱于毫髮爰慕史魚之諫仍希
魏證之忠隕淚无從籲天有請伏願 皇帝聰明勿蔽智勇必行

進君子而退小人寬民力而節邦用紹復祖宗之法度整頓乾坤
之紀綱故使海內傾心上天悔禍叛臣假息行卷土以來歸逆虜
遊魂即倒戈而遠遁迺二聖重徵之日還九州共貫之風遂同光
武之中興不比晉元之南渡臣獲死牖下長謝人間茲續之悲惟
忠孝必先于愛子結草之報雖泉壤不敢以忘君臣无任

聖宋名賢五百家播芳大全文粹卷二十二終

東武劉氏嘉蔭篋宋本校鈔

聖宋名賢五百家播芳大全文粹卷二十三

賀啓

賀文太師啓

李成季

光膺策命入拜師臣三公惟人大廈有棟樑之任一相處內四方如泰
華之安天扶聖君人望元老歡樂精神之會流通上下之情禮無與隆
時所罕遇恭惟 某官孕靈嶽秀配德坤元器深厚而有容道直方而
不撓武足以戡定亂畧文足以潤色聖謨可託大事則社稷之臣不親
細務則帝王之佐進人如已愛物以情碩畫嘉謨換寧於華夏陰功隱
惠享感于神明故能業亮四朝身兼五福出入將相幾四十年古今勲
勞無一二革屬真人之嗣服攬四事以圖新謂國軍禁令有未決之疑
左右輔弼皆後來之俊俾辭留鑰入造內朝集冠蓋於都門羅饗殮於
候館衮衣已往難留洽水之舊邦皓首復來共識仁皇之真相龍光疊
被衢路榮觀于今熙河之餉餽甚艱遼夏之疆隅未復不足者九年之
食已傷者百姓之財將冗而卒驕吏繁而負溢永賴著龜之舊德克開

社稷之遠圖俯陪誦鼎之司獨踐位槐之地壽考之美方邁德於汾陽
禮樂之功更仰成於姬且某素惟鄙昧久荷獎提台座燦煌悵披雲之
在望驚蹤疲曳但服駕以長鳴

賀蔡太師啓

翟公巽

伏覩詔制正月一日大慶殿朝賀受傳國八寶 太尉冊拜太師者仰
止三朝之老蔚為萬乘之師裂以山川世祚之封崇以鈇鉞專征之器
貴窮人爵克向天心古者天子有七人之爭臣太師首三公而論道所
以儀刑海內輔導帝躬嚴朝廷則爵為達尊事德義則貴有所屈成湯
先學於伊尹必有所不名之臣穆公無人乎子思不能安長者之側有
來命世之哲以起非常之公功恭惟 太師道濟彌綸文能經緯非予
覺之誰也豈曰友之云乎王曰嗚呼父師作祇命周公之冊余惟克邁
乃訓繼舊學甘盤之賢極名器則禮敬益隆咨典刑則老成為重就訪
大事必先博史之乞言俾乘安車參用黃門之設几底於五典論厥允
疇以鎮定如年巖石之瞻以博厚若阿衡之倚一國之巨室所慕為政

東武劉氏嘉蔭篋朱本校鈔

不難天下之大老來歸其子焉往用能制作禮樂頒度量於明堂寅亮
聖明受泰元之神筮肇稱寶玉於赫稜容然而無競維人惟德其物昔
有倚相能道訓典晉大夫失問於白珩子反善理兵戎秦使者改觀于
和辭不有君子將焉取斯洪惟熙洽盛治之聖朝相以瑰璋光明之人
傑光於史冊配君陳畢命之書載之聲詩詠嵩高蒸民之雅

賀劉太師啓

石敏若

帝制坦明誕布外朝之聽師垣峻極有嚴上宰之班極名數以稱格天
之功隆體貌以示尊賢之等名實之加四達爵祿之報兩崇成命式孚
有生胥慶伏以神文廣運若阜陶則見而知之聖武布昭舉伊尹不仁
者遠矣允若君臣之同德能制帝王之極功自古以然於今為甚威恭
惟 某官才貫三極智周萬微每見之于未形常行其所无事道合聖
賢之用舍身係社稷之安危天眷有邦昇斯民之嘉靖帝選于眾越諸
老以登賢作興於一時之間超軼於千載之上治成德備而百度理施
博制廣而四夷賓質之于詩書而有稽告之於神明而無愧嗣奉緝熙

之典丕承燕翼之休協三代受命之符厚其戩穀作八瑞鎮邦之寶登以端元方溟澤之均行豈鼎司之可後肆頒顯冊承籲師言位著有光諧師臣之步武陸康加峻壯王國之尊安伏念某結約凶奇聞闕少予病樗何用亦參萬國之春弊自珍孰辨千金之享倘未亡于簪履終有賴於錘鑪望履無階但想鷹揚之表飾辭有映仰伸燕賀之儀

賀文太師啟

宋文淵

重膺顯冊榮拜上公委軍國之深機奪邱園之至樂中外胥慶神人以和矧衣被於恩涵豈雷同于至樂伏惟某官直方而大含洪而光學為王者之師身在當世之重出秉麾鉞入掌鈞衡堅一德而無二心弼四世而歷三紀草木魚鼈以之而成若陰陽天地以之而泰通功成不居身退自遂於邈得无疑之利於漸為可用之儀方大人之繼明思厚德以載物還以論道屬之經邦以鎮安華夷之情以負荷廟朝之寄雖二帝上庠西序三土左學東膠方漢事桓榮之尊魏優王祥之養姑寄善於惇史或乞言於暇時莫如進退之間獨係安危之大昔望吾君如

東武劉氏嘉蔭後宋本校鈔

舜翻然起莘今欲天下一周老不歸魯富簡策難傳之事業有丹青莫狀之輝光某夙範陶鈞生全卯翼孤投塞壘遠總兵戎備廝役以無由望台光而展慶神馳心結意在言殫

賀秦少保啟

汪彥章

伏頒明詔登用大儒疏榮三少之班正位百官之上生成所及鼓舞斯同恭以某官言合六經學色萬古由周公傳之孔子獨成師友之淵源惟尹躬暨於成湯適應君臣之期會久借本兵之重多輸納誨之志方功名未究於經綸舉中外皆形之歎息蓋文物於斯為盛歆平治捨公具誰故除書甫降於九天而和氣遂充於四海某早蒙知獎叨被使令逢恩寵之鼎新預生靈之鈞播雖官聯在遠莫能陪多士之班然謠俗至公當採作烝民之雅

賀秦少保啟

鄭敦夫

玉檢告成載篤中興之緒麻綸敷旨茂昭夾輔之勳祇服寵霧函躋寅亮臚傳所暨公謀攸歸少保大觀文吾道宗工斯文先覺規模國器

士業相門吐論皆前輩之風流落筆非後來之氣格飛英騰茂決科獨步於一時盡忠竭嘉致身橫飛於兩地贊廟謨而底定纂聖統以承休惟昔彝儀禮素隆於列辟矧茲異數位宜進于二公未盡疇庸更陪行賦某自惟朽鈍素出甄陶盛事會逢尚阻南州之小壘喜懷增劇莫隨東閣之後塵展慶無從馳情惟切

賀韓丞相啓

唐子西

顯奉制麻延登宰席播騰九有惟慶一辭竊聞考元龜以斷大謀不如舊德指喬木而稱故國未若世臣才猷夙著于廟堂名實已隆於天下故社稷因之而倚重而朝廷恃此以稽疑恭惟某官器重海涵神清玉粹天資攸稟有仁民愛物之心家學所傳皆論道經邦之術藹揚令聞坦涉亨途頃任樞躋謀已深於漢屋出臨闡寄澤未溥于商霖政地久虛僉言允屬值聖朝之嗣服思輔相以迓衡名還三遷遂宅百揆章平盛事固無愧於古人房杜全功誠責全於今日必將盡發胸中之蘊度幾大慰海內之心某承乏遐陬側除目阻遠潭之府莫趨西之

東武劉氏嘉蔭後宋本校鈔

階叢扞寸誠難形尺牘

賀左丞相啓

李成季

拜命大庭分揆左揆天人相與君相並興千載一時永契太平之會四方萬里共蒙生氣之和竊以舜命舉卑陶而竄不仁高宗命傳說以求古訓因先王而為政為天下以得人竦佩遺風復見今日願安危之所繫宜上下之稱歡恭惟某官名世真儒生民先覺稟三才之氣思則無邪以四海為心達則兼善智大而必先於遠致行高而不可以小知未嘗枉己以直人豈憚屈身而伸道三諫不聽漠無干澤之私萬鐘何加惟有養恬之樂屬大明之紹服講度政以圖新急聞至言優禮元老以公議而自處為衆人之不能匹夫未安深軫納溝之念至誠獨立靡懷濡足之憂故進賢退惡而多士歸心興利去害而庶民不議果膺睿渥參秉鈞衡飛鴻之遇順風已如夙志大旱而作霖雨咸賴我公益扶萬世之安永尚一人之慶某猥叨憐遇倍切懽愉限守州符阻造台屏

賀趙丞相啓

張全真

伏審決定大策建中興不拔之基褒賞元勳正上宰久靈之位王廷孚
弼海 交歡竊以赤烏袞衣美征東之姬旦命圭相印答平蔡之裴公
播在聲詩光於簡策况卻憑陵之巨敵有開恢復之宏規示丕勸於羣
工宜首膺於異數恭惟 某官直方而不撓敦大而有容獻納論思夙
著排姦之節贊襄輔弼尤高經遠之謀惟光武能推赤心而絳侯可屬
大事會羽書之遽至奉草輅以徂征師律一新坐據江山之險捷書屢
上幾成京觀之封致醜類之宵奔本嘉猷之宸告射鵰買勇雖多李廣
之无雙指獸收功誰出蕭何之第一宜班宸綽首冠台躔舍爵之賞既
行歸疆之期可待某逖聞誕告喜越常情昔忝同升謬託金蘭之契老
思自放願諧邱壑之求頌咏之私敷宣曷既

賀湯丞相啓

熊子復

伏審褒異真儒躡登元宰熙帝之載早並列於秦階秉國之均首進顯
於魁柄經綸雖久潤澤惟新恭惟 平章僕射相公毓粹昭回儲精峻
極翔蛟龍躍虎鳳炳焉華國之辭閉雷霆藏風雲渾然經世之度冠殊

東武劉氏嘉蔭移朱本校鈔

科而挺出歷要路以橫飛勢不倚於水山望自隆於岩石絳灌雖毀不
能使文帝之疑禹山既除宜首用弱翁之相粵從樞筦躡正冢司彌縫
萬機粉澤百度勒成曠典述丕顯之文謨結好殊鄰示允懷之漢德崇
儉以省國用惟公以收人材果疇專美之功遂陟久虛之位身榮上衮
心協前旒昔神文享國之長繫宰相得人之盛然天聖之脩真錄乃王
文穆之持綱而慶歷之申遠盟乃呂文靖之當軸節冗費則賈魏公首
建其謀抑親黨則章卹公自守其謀雖舜帝之有五臣足誇當世然周
公之施四事并掩前人宜乎史臣殫簡牘而屢書文士極翰墨而交頌
况萬世遇大聖方垂拱而仰成於一代為宗臣彌縫而藏用浩若元氣
運於太虛人莫測其端倪物陰被其膏澤某早窺崇仞遠託洪鈞名則
甚微半世選舉而始得學雖不輟過時勤苦而難成倘蒙造物之憐獲
免抗塵之賤則專具筆札盡心力於斯文率作歌詩尚形容於今日

賀蔣丞相啓

洪景伯

伏審還位中階進居首鉉簡在上帝夙膺柄用之專圖任舊人起副具

瞻之切郵傳四出廟奠一新竊以舜以不得臯陶慮萬機之或壅湯則有若伊尹諒一德之相依惟其寔係安危于身故去猶失左右之手奉朝為威前輩可稽趙韓王奪服於建隆之間式遵古誼富鄭公年辭於嘉祐之後第鬱師虞蓋遭變事者務度其宜而為忠臣者在移其孝恭惟平章僕射相公著龜先覺柱石壯猷應變成務而挺有祖風同寅協恭而甚稱上意如丙吉之按邊瑣既預科條若崔相之除吏負更公薦舉方任秉鈞之重遠惟陟此之艱位雖忝于巖廊春益浚于黼衣肆舉奪情之典益疇佐命之勲家事雖勤詎可辭于國事人心既悅宜遂格於天心豈但復于中臺仍更陞於上衮况十事說天子已前定于規摹則一代為宗臣度永扶於基業某猥貳九卿之列忝居百職之間宣制于廷共儒伸之相慶立班于路迎相衮之來歸敢再扣於崇墉輒自通於竿牘攘振弱植方依舍宇之摩空纚紼輕帆或助神舟之濟海

賀劉丞相啓

劉夷升

榮膺策命追掌綸衡十行傳於置郵四海為之歌頌竊以爰立之任從

東武劉氏嘉蔭履宋本校鈔

古所難宣帝中興之功惟丙與魏明王勵精之治非宋則姚吉流于懦而相失之嚴崇溺於權而景窘于用雖茂美績誠非全才故明皇愧於守成而宣帝甘於雜伯致君同堯舜之威接武繼皋夔之賢治本得人朝廷增重恭惟某官忠勤許國康濟乘時遊于道德之淵源潤色以詩書之華藻主上撫艱難之運受重寄于祖宗大臣以康濟之資報異恩於君父屬雅懷而素定注上意以仰成天地鬼神明其心鳥獸草木均其賜某受知最厚念答方深睹端揆之得賢喜宗祧之蒙福夙興夜寐敢忘庇覆之恩飲水曲肱與享太平之樂

賀左丞相啓

何子固

伏審誕告帝庭崇登宰席君臣一道夷夏均休恭以某官天掖英才人資先覺神明意用足以官使有造之俊髦談咲發揮足以酬酢无形之事變參元豐之法從冠紹聖之辭林道德文章一世宗匠言諫風采四方表儀出處係天下之重輕卷舒為君子之消長起從琳館服在巖廊夷考嘉猷峻躋揆路蓋聖賢之相得若旦暮之可期豈思載月之功

始協雲龍之會故有虞選衆必屬皋陶而湯后格天寔資伊尹觀神考
所以遺公於今日之志與執事所以致忠於本朝之心方且振起頽綱
葺完舊典大備一王之制作追還三代之規模必使壞植散羣紹閱休
於先烈豈徒興滯補弊收近效于當年遂格元勳益隆昌運是為天意
豈獨人謀所以神感淵衷潛發文王之夢帝思碩德式迎公且之歸事
映古今道光簡策某詩書淺學口耳近功掃舍人之門未塞依歸之願
望平津之館空馳夙夜之心驩抃發中情誠並竭

賀左丞相啓

孫仲益

大庭作命揆路陞華鼎鉉不移首冠九官之右台符增煥益隆四海之
瞻某聞解琴瑟之絃所以正五行調鼎鼐之實所以齊衆口蓋習治久
安之弊而翫水歲愒日之多蟻穿弗填有潰隄扶石之憂蔓草不圖為
錯節盤根之患悼折肱之已誤顧反掌而奚難戒覆車之轍則安焉易
敗者之兵則勝矣恭惟 僕射相公受天大任為國元臣屬當宁旰食
之初承前人覆餗之後 五色之石而欲試補天之手儲萬金之藥而

東武劉氏嘉蔭後宋本校鈔

共推鑿國之工剔除邦蠹而復睹清明救療民瘼而一消疲瘵丕冒惟
新之化獨高再造之勳書郭中令之考而與國均休享衛五公之年而
與民偕樂頌言如此輿論所同某枯朽陳人伶俜末路久託林居之陋
側聞廷煥之傳倍深喜躍之情實謂知憐之素惟宰路播洪鈞之大每
懷藜藿不採之恩而神仙隔弱水之遙詎復雞犬同升之望

賀葉丞相啓

熊子復

伏審宸衷圖舊廟算倚平大老遙歸方總機廷之重真儒柄用首躋鉉
席之崇朝野具瞻華戎咸賴竊以舉直而錯諸枉舜湯所以君萬邦舍
藏而用則行孔顏所以師百世既聖主察流言之害宜元臣當注意之
隆破斧而缺錡戕詎損周公之德濟川而作舟楫迄資傳說之功恭惟
平章僕射相公任重降天才高命世蚤膺親簡徧歷從途封駁无私事
必參於典故銓擬有序時更立于章程逮進貳于弥綸果深裨于綜核
功高衆忌日月無得而踰盜賊自將風雨不改其度几爲暫聞於本國
介圭復見於來朝張良運籌已獨優于三傑魏相總職宜首贊于萬機

豈特輔重華協帝之勳止當究上策禦戎之備苟政刑明于閒暇有要
有倫則道德成乎安強元悔无拂遠追景德祥符之烈近述熙寧元豐
之摹某早出門墻叨居省戶路車乘馬方瞻入覲之容衮衣繡裳亟聽
登庸之典既班庭而旅慶猥贊績以寓誠廣廈萬間已幸忭懽之庇洪
鈞一氣尚希域北之陶

賀趙丞相啟

毛伯穎

光奉制書進登揆席得力收而先五帝克贊皇猷命傳說而摠百官大
疑臣績蠶書誕告輿頌交歡竊以炎運中微既會偶丁于百六洪圖未
艾咸登方繼于五三將隆再造之勳必賴非常之佐帝思俾乂大拯橫
流民具爾瞻仰高瞻石倘匪過人之英傑孰隆下世之功名而况戎狄
貪琳既稔豺狼之惡師兵簡練久韜熊虎之威宜獨制于中權用克清
於大慙師直為壯莫高孤偃之謀唯斷乃成寔繫裴度之用據兩朝之
宿憤折萬里之遐衝讀命彤庭始僉全于九列申威紫塞遂震疊于四
夷大哉聖謨恢此賢業恭惟 某官智周天緯學貫民彝軀君子之中

東武劉氏嘉蔭後宋本校鈔

庸蹈賢人之久大教詩書而悅禮樂綽有成謀定社稷而安國家自其
素蘊凜乎天下之模楷蔚為朝廷之羽儀荐更二府之榮獨任四方之
責撥亂世反之正微斯人誰與歸簡在帝心授以魁柄運動樞極法太
微三光之庭振理綱維清文昌萬化之本式是百辟格於皇天錫鉅鬯
以告文人召伯猷萬年之頌受彤弓而揚休命晉侯陳三覲之儀敷德
兼隆古今莫二某孚孱陋質撲邀散材金馬石渠嘗蓮行朝之表著銅
魚竹使自淪遠郡之簿書喜聞才館之開願備洪鑪之託輦頭鼠目難
逃水鑑之明牛溲馬渤或備藥籠之用

賀秦丞相啟

汪彥章

廷揚乎辨國拜元台有道而守四夷方懋中興之業好要而論一相寧
須夾輔之勳天意會同人心闡懌恭以 某官運逢真主志在生民聚
精神帷幄之中絕躡貌簪纓之上安危大計孰堪舉國而聽焉前後數
公方見得君之專者積三載處中之望副九重處左之求魁柄不移衮
衣增煥方且收威權于玉室示風采於敵人取河北一百餘州今其時

矣書汾陽二十四考行且見之某久記洪鈞所聞顯冊屬拘縻于成乘障阻趨走於班庭弑藩將中廟堂多暇異筵鼎茵之節永為宗社之休

賀張丞相啓

晁之道

恭審渙號大廷晉陞良弼宸衷簡注見濯用之得人國勢尊榮知治安之有日伏惟慶慰竊以君臣相遇古今至難玩歲愒日則必悔於噬臍趨事赴功則每虞于掣肘故時君克斷裴度所以成功而朝議多違羊祐不知如意是非天意悔禍人謀允臧則何能用大度之言于以越中興之運恭惟某官奇才命世妙畧濟時洗日咸池功素高於社稷捫參蜀道名已振于蠻夷雖更夷險之殊不替終始之遇屬傳羽檄趨下鋒車復正位於鈞衡仍撫師於疆場運籌帷幄而決勝于千里致醜虜之宵奔端委廟堂而為準于百僚副輿人之夙望寔惟圖舊何止策勳伊尹一德以享天心无間然矣漢高五載而成帝業尚切遲之益堅帶礪之盟增煥鼎鐘之勒某辱知最久贊喜尤澤閩海相從已熟衰殘之迹荆溪休老願諧退縮之心頌詠之私名言罔既

東武劉氏嘉蔭發宋本校鈔

賀左丞相啓

何文縝

伏審寵錫元勳誕敷明命顯躋峻秩超正上台九在陶鈞舉同林慰恭惟某官高明純亮博大淵通器周文武之宜道濟功名之會行其所學致身夔契之間迄用有成濟俗唐虞之上方且增煥丕承之烈發明垂裕之功廣學校以新人材睦宗枝以厚風化大備一王之制永圖萬事之康分飾師于遠平蠻徼山川失其險阻冠帶被於遐荒文治既優武功復暢蓋裴度有平蔡之烈不致能治於太平魏相推佐漢之名尚愧弗通於征伐載惟成績獨掩前人某早以庸靈厚蒙眷獎方塵罷使阻造公門懽頌之誠敷宣罔既

賀魏丞相啓

孫仲益

伏審發冊疇庸揚庭布號楹佐王之學必有漢閣麒麟之勳開負弼之祥果應渭水熊羆之兆恭惟某官受天大任躋世中興方當四十強仕之秋已展九萬垂天之羽恢遠大經邦之略極于四遐運沉深先物之幾妙於百中金甌獻十芝檢疏榮于天下宰一新文昌萬化之源以

人中傑迥出漢廷諸臣之右便從黑頭歷郭令中書之考直至黃髮給
孔廣靈壽之扶如某者老境蹉跎窮途栖屑墮井誰肯救而又下石焉
餘燼寧復然猶有溺灰者卒賴造膝一言之重俾出填溝九殞之餘洪
惟此恩何以論報側聆誕告尤激懽悰寔副卿大夫百執之具瞻豈止
愚不肖一夫之私喜

賀左丞相啟

邵公濟

伏審誕膺顯冊進秉鈞衡朝野流傳廟社增重恭惟 某官勲庸載在
王室道德格于皇天持海上之節來歸白首而典屬國起渭水之濱入
輔黃髮而亮武王功蓋一時名著百世耻君不及堯舜茲茂著于嘉猷
當饋恨无蕭曹遂無間於聖慮行見鞭笞四夷而禦侮度幾振舉百度
以仰成輿論所期斯言可必某侵尋暮齒託備藩維自愧亡奇遂占陽
城催科之考度幾它日及見鄭公仁義之行

賀湯丞相啟

黃伯淵

顯被絲綸寵還机軸節彼重瞻於巖石炳然載仰於台符禮集百僚歡

東武劉氏嘉蔭篋宋本校鈔

傳四極恭惟 某官乾坤間氣社稷元勳依兩朝日月之光慶千載雲
龍之會坐鎮雅俗江左謂之風流名播遠夷天下繫乎輕重方當宇力
圖於恢復豈囑廊久輟于絳綸雖周人无以我公之歸然謝傳當為蒼
生而起以投机破敵固難測於謝安而州詔指蹤將獨決于德裕爰制
難于千里之外將信威於兩河之間虜已在夫目中治可運之掌上某
欽聞顯命喜溢卑悰益馳燕廈之誠緬想鳳池之峻爨調多暇氣序寢
清願精寢鍊之調式副簪紳之望

賀湯丞相啟

宋仲山

對歆宸冊登用冢司依兩朝日月之光華得千載風雲之感會龜鼎增
固朝野寢和恭惟 僕射樞密相公德格天淵忠衛社稷翼浮雷而出
震霽霖雨以濟商進膺虛左之求深聳處中之望蓋衮旆有闕惟仲山
甫能補之若世事極設見管夷吾無憂矣故威名獨重於它相而風采
益動于遠夷揭機柄以不移煥台躔而愈躍用真儒無敵天下遂有若
周公之功約諸侯先入闕中必能堅高祖之意中興可待遠業攸歸某

久託洪鈞忻聆顯命屬遠縻之使指仍阻輟於荷班九列無堪固難入
翹材之館三書欲上願將登光範之門抃躍之私敷陳罔既

賀張丞相啟

林豈塵

欽膺宸冊進陟台衡聳巖石而具四海之瞻秉洪鈞而為萬物之補平
章雖舊渙汗惟新恭惟僕射都督相公道德正傳天降大任作傳野
之霖以蘇厥旱洗虞淵之日而夾以飛方從鴻閣以重登詎許鳳池之
久奪風操可記想不忘嘉正之名沉厚有謀蓋惟恐東之老况關中賴
蕭何而鎮撫天下繫裴度之重輕當乘君子大有為之時能辨羣臣不
可及之事歷中書二十四考其在于今復兩河三百餘州可立而待某
跂聆顯命喜集重矜以青天白日而知其清明惟春風夏雨而出于造
化依炎州而羈迹望光範以馳情相印命圭雖阻桃林之賀彫戈錫盾
願廣淮蔡之歌

賀陳丞相啟

洪景伯

伏審蔽自淵衷寵還魁柄胡人南下運籌思漢傑之才丞相西來奠枕

東武劉氏嘉隆後宋本校鈔

慰周京之望敵情未戰而先沮師氣不作而自疆窈以大寒而索衣裘
雖失禦戎之備巨川而作舟楫豈无濟世之圖是故雍熙河北交兵而
趙忠獻復踐於首台康定陝西用武而呂文靖再登于元宰玩四夷猶
兒戲爾迄底咸寧仰二公若神人然詎令專美方醜類犯邊而孔棘况
冢司虛位以誰籌事有至難類極溺救焚之舉人惟求舊屬扶顛持危
之才恭惟少保僕射相公一代真儒兩朝元老學陶盛德見堯舜而
知之蕭何大功與閔散而爭矣如非烟祥風而物被緣飾若有人青天
白日而人知清明方慈闈之倚平值逆亮之送死首顯廟算用堂上之
奇兵坐攻虜營起舟中之敵國速相重華而協帝悉將眾美而效君具
隆巖石之瞻勇遂急流之退大臣惟郭令身獨繫乎安危外國於晉公
使每詢其用否適丁多故允賴壯猷詔札使輅繼催入覲命珪相袞仍
即外除遂策東魯之封併本西樞之柄方將駕馭諸帥無飛揚跋扈之
雄總領群公有輔贊彌縫之用庶幾復文武之境土豈但捷秦楚之甲
兵某夙賴洪鈞聳傳華屋巖廊揆策方圖開闢之勳清廟薦詩願竭揄

揚之思

賀左丞相啓

汪聖錫

伏審播告大廷晉登上宰峻班儀於左棘首揆路於中臺四夷聳聞九鼎增重伏惟 某官賢推名世道富經邦嶽降神而生申寔維周翰帝賚弼而得說用作商霖變故屢更精忠弥著掃除內亂高五龍夾日之勲攘卻外虞成一馬渡江之業方輔寧于法駕將經略於神州具錦邊興扁舟徑去屬分江而謀帥乃扶鉞以臨戎羽扇綸巾已坐清於妖祲命珪相印蓋疊賞於元功矧獨兼文武之資宜並注安危之意逮聞虛位果趣賜環非衣之謗何傷有袞之思咸屬願乃心王室喜魁柄之重歸而戮力中原佇皇家之再造天時有待物望攸同某跡滯一涯神馳數仞聆制麻而相慶曾無瘴海之殊引賓履以交趨獨歎翹材之阻其如瞻頌莫盡名言

賀丞相啓

沈清

八年政府軍國之効昭然一日宰司天人之心允若維相有作繫時所

東武劉氏嘉隆後宋本校鈔

尊雖上天不肯隱然以生成雖人主不敢輕忽於付與適求既往率開厥先意令舉世以心知庶使居位而人服或反拔木之風以彰其任德之實或生同穎之禾而告以共政之符或肖形象而求於巖穴之間或假卜筮而取于漁釣之內聳以甚神之迹歷夫至衆之情處臣鄰之極而天下莫敢望焉得夷夏之悅而賢者然後安至此若興王之佐欲為經世之圖每致嚴於始進之時直有待於衆定而出處莘郊非三聘而莫起臥草廬至屢顧而後興居東山者甘蟠屈以俟其逢遇黃石者亦徘徊以觀其可落落風雲之會寥寥歲月之傳謂言元首之股肱寔係黎獻之耳目聽爾衆言之可否卜吾國勢之重輕宜茲授受之兩艱良恐信服之不易欽惟二月之廷制冊拜一朝之宰臣聖皇專御殿以致禮貌之殊宮禁丞授麻以揚功業之盛百辟肅恭而俯聽班行私語而說文忠萬姓踴躍以歡傳走卒齊聲而稱司馬士子以主盟之有賴爭濡毫以矧慶歷之歌詩裔夷以夙昔之所聞每遇使而問晉公之年紀是何普天之下洋々而有喜色蓋猶在位之久事々而合衆心自初睿

主之隆興即仰真儒之特起一紀雍容於從橐歷年端委於廟堂二十
六載之設施雖由聖斷千百萬言之啓沃孰若公多始以文章而發帝
業之光中以鯁亮而王國論之是偉矣敢言之氣卓然難進之風規模
已定于前時問望豈惟於今日追伊張葛謝之出處起大名於乾道之
先奮臯夔禹稷之事功當重任于淳熙之後而况湛然之清識更尤超
爾于人羣視富貴以無心願萬鍾何加於我堅持守之有道雖一介不
取於人惟踐履行今世之甚難願敬畏非它人之可比孰不履地望隆
獨重於太山如彼觀天目覩唯尊于列宿以人心歸向而為輔弼以歲
時積久而茂功名首開闢于治源力扶持於公道舉措動遵于成憲發
揮皆自於聖謨三事遍更萬務畢舉傾參持於國柄辯章斷斷以惟平
暨專領于使權績效昭昭而益著逆折胡酋之氣至今巢穴以遁逃盡
清狂士之謀坐使邊陲之安靜世已行者皆久長之至計日深究者多
致遠之良圖作礪之金愈煉而愈精乘國之航愈操而愈固豐功塞乎
天地之大貴名揭乎日月之高其効若斯不相何待彼昔賢厥初而歆

東武劉氏嘉蔭後宋本校鈔

行已志故多遲疑於向背之間惟我公已試而深得衆情宜茲鼓舞於
榮拜之日天心克享無煩影響以示人君意式乎不假勤渠而詔下於
皇盛事盡掩前聞恭惟 丞相佐時聖皇齊古碩輔求諸典籍居相位
者不為無人究厥勲庸如門下者能有幾數惟宗社遺无疆之慶故皇
家得不世之賢矧光前事業之居多而于今名位之弗稱倬彼雲漢既
欣滿月之瞻譬如北辰共快魁台之指咸願得天而久照殆將與國以
同休某夙被陶成今逢時至念納溝之失所恩已戴於言前倘在野以
旁招願不遺於人後

聖宋名賢五百家播芳大全文粹卷二十三終

聖宋名賢五百家播芳大全文粹卷二十四

賀啓

賀葛知院除右丞相啓

陳安行

右府五兵之本夙倚壯猷中台萬化之元聳聞真拜舉窟穴黎元之衆
泊播紳韋布之流久矣具瞻茲焉起舞恭惟特進大丞相先生圭璧
無暇之器棟梁特異之材智周事物而躬好問之誠才格經綸而無滿
假之志蚤蜚英於清切旋闊步於禁嚴秋官之總祥刑民以无望春官
之位端尹道斯可尊從容辰告之猷密勿夜前之席遂登丞弼跡贊機
微經武整軍於閒暇之時圖事揆策于筮諱之頃孰相公朝廷之初政
无踰舊學之元臣方將彙進人才以興起功厚培根本以惠綏暇迨邊
防必責寔而剗具文之弊吏治必核真而革滋偽之姦蓋平時抱負之
傑然故今日設施之易耳導以經術陋漢帝之禮望之格於皇天如成
湯之學伊尹某疎庸一介茸陋衆人念蚤緣蒙特達之智允進用率提
撕之力茲化鈞之廣播諒鑿質之無遺鸞鳳冲霄正爾仰成於忠力燕

東武劉氏嘉蔭移宋本校鈔

崔賀厦豈惟永戴於旃幪依嚮深勤數陳莫既

賀朱丞相啓

汪彥章

豈布策書寵還魁柄昔周公未復頗遭四國之流言今裴令來歸當使
兩河之聽命天下相慶朝廷益尊恭惟 某官望絕播紳勲書彞鼎學
博而知要明古今治亂之原才全而不形得天地中和之氣昨屬羣凶
之擾允資一相之謀禍泯胚胎變消肘腋蓋厥初同德惟尹躬之暨湯
果于變成功安劉氏而必勃越從分陝久輟贊元帝憂堂陛之勢凌人
恨衮衣之歸晚方時多事疇協濟於蕭規宜我老成首先光膺於託命
再幹洪鈞之化一新巖石之瞻某早辱眷知忻聞登用屬拘繫于印綬
阻趨拜于門墻歲律成寒巖廊多暇冀謹寢饗之節永為宗社之休

賀朱丞相啓

鄭載仲

聿膺大冊進拜元台慶本朝之得人想中興之有日傳聞四海驩喜一
新恭惟 某官覺在民行先為世表罄忠嘉而許國懋勲業以格天大
纛高牙暫寄九江之屏脩繡裳赤舄造陶萬化之鈞衡出入係皇猷之

東武劉氏嘉蔭錄朱本校鈔

重輕猷為寔蒼生之性命幹旋大柄熙然春天下之妹恢復中原廓爾
泰邦家之否行其素蘊副此具瞻某逖守郡符阻趨台屏永言忻頌寔
倍等倫

賀湯丞相啓

熊子復

伏審嗣皇圖舊真相秉鈞當食而歎蕭曹既倚宗臣之重制梃而撻秦
楚何憂敵國之強休聲不約而皆同和氣非召而自至竊考本朝宰府
之故事有若先正沂公之迭為天聖初來既踐昭文首台之位景祐再
入乃屈集賢次輔之居雖官賤之小殊而相業之益盛矧惟今日度越
前人恭惟 平章僕射相公驚代鍾才際天蘊識初心道德必期整頓
於乾坤餘事文章尚堪黼黻于河漢夙佐光堯之治寢隆復古之勳中
暫去于廟堂旋既歸於帷幄北伐張仲在矣內既委于居留東郊君陳
往我外更煩於綏撫適際飛龍之造亟興甘雨之思召自燕閑還居翌
亮仲虺相湯為左昔正登庸台公主陝而西今同夾輔謀契沉幾之運
益校遠馭之圖任良將而邊境必安拒壬人而蠻夷自服用續經邦之

業仍取闢國之勳某猥抗塵容逃瞻潭府簡書是畏是憐學術之荒播楚或辭尚托化鈞之播

賀梁丞相啓

林豈塵

伏審渙旆楓宸奮庸槐位惟龍首八十而五得黃扉衣鉢之傳今鳳歷二百有餘為清源桑梓之盛傾朝歌艷載路游揚本遠業之攸先實中興之所係竊以黃帝得六相各有使以為之治成周建三公不必備而惟其人我皇朝舊制則襲隋唐僕射之名聖天子更化而復秦漢左右之歸繫稱謂之鼎正在注想之深勤房杜之能斷善謀惟淡知而相濟姚宋之守文應變斯為治以同歸聿圖承助之賢協運變調之化載颺新命式慰具瞻恭惟某官道得正傳天畀大任褒然為首洋洋是董公孫之言懋哉惟時濟濟稷契臯陶之遜方爰立而置諸右於當今所捨其誰履富貴之塗而素所行處功名之地以藏諸用聳巖石節彼南山之望列布衣躋然上衮之榮對安輿而起居復見回班之禮扣閣門而闕白坐聞宜祿之呼故事一新師言胥慶某側聆異數喜溢叢

東武劉氏嘉蔭後宋本校鈔

矜雖溝渠無望於青雲然奴隸皆知白日俸祿給以衣食將不忘數年封侯自見之恩冠劍拂其塵埃敢竊效三日待公奉酬之詠其為欣抃曷既封陳

賀魏丞相啓

熊子復

伏審妙簡前旒嬪躋上衮論相為重久稽夢卜之求得君既專亟峻鼎槐之任萬機有助百辟無譁竊以泰符相比於天階宰職共持于國秉官不必備或曠歲以久需人皆曰賢則崇朝而並進仰稽昭代卓有宏模景德之缺位累旬始同除于寇畢熙寧之虛席數月方對任於王韓邈前後以罕聞亘古今而僅見恭惟平章僕射相公自天降任與世作程杖節申盟夷狄叩五原之塞揮毫演語文章追三代之風逮登贊於經綸亦兼陪于宥密詠天保采薇之什克佐永圖較神爵甘露之年聿彰成績果膺枚卜益副具瞻陳五利以和戎已繼家聲于莊子同一心而輔政更追世績于弱翁庶臻復古之勳茂建格天之業是為希曠孰與茅倫某自攝使於畿都及為郎於省戶皆由恩紀未有報圖茲聆

大號之揚寔倍常情之喜萬間廣廈已幸庇于幘幪一氣洪鈞尚奠陶於坱圠

賀陳丞相啓

楊萬里

登庸正人使宅次輔非難得宰相之位進賢則其國安不必問太平之期用功則其効敏天有所待世或未知恭惟某官績洙泗以後之淵源追唐虞未遠之人物動容貌以肅天下已皆趨風舉夷夏而直胸中了如觀火召來兩地亦既三年所挾愈大而合愈難求去者堅而留者衆觀其守道之如許不付之大事而其誰用之小遲是以國人懷不滿之意試之既効然後明主有必信之心右席之虛君子是荷宜有遠略用宏雋功治道无它正在一正君之妙學敵人易與終將九頓首于大庭某自知其迂敢速於售抱賈誼積薪之疏空有狂言哦少陵看鏡之詩真成半老獨恃知已不虛此生北道之東洪鈞豈謂千齡之遇東閣之來衆彥未應一士之遺

賀右丞相啓

王宣子

東武劉氏嘉蔭後宋本校鈔

伏審誕宣中制播告路朝褒言增袞綉之華進秩副魁衡之量九居陶冶罔不忻愉伏惟某官高華並高淵泉含潤積古之力純粹以精致君之心直方而大潛有上前之啓沃發為天下之輝光丙魏扶本始之隆姚宋翼開元之盛不猶一體相待而成雖曰二人同歸于治果被都俞之命更陞顯奕之階位冠疑丞功裨造化某屬分符竹難望履綦願頌詠以何勤豈編摩之可究

賀范丞相啓

秦少游

光奉明恩進陞右弼伏惟慶慰恭以某官器兼文武學備天人出處繫一時之安危議論為四海之輕重臨大節而不奪雖小善之必為荀氏羣龍慈明為最河東諸鳳伯衮尤奇拔闕散而問望愈隆涉憂患而精誠益壯果濟世美簡在帝心昔執鴻樞既致干戈之戢今居端揆何難禮樂之興坦然衆正之路開行矣太平之責塞某叨分符節辱在陶鎔陪班謁以無緣第承風而竊抃

賀右丞相啓

孫仲益

伏審襄進台司誕揚顯冊天佑一德惟尹暨湯運濟千齡生申及甫播
紳胥悅黎獻交忻恭惟僕射相公清明冲淳剛毅沈塞親逢上聖服在
邇塗惟文昌萬化之源上熙帝載而僕射百僚之長下竦民瞻果符夢
賚之求亟正鈞衡之拜慨七年之旱方資傳說之霖燠十日之寒咸向
趙衰之日治道清靜王路坦平聖心仰成國勢增重某門墻舊物湖海
餘生辱知感甚于脫驂聞命喜深于折屐衣雖敝而可改常叨起廢之
恩冠已挂而莫殫但切歸榮之願

賀朱丞相啟

孫仲益

玉冊疇庸登既獻卜老成人在位朝廷自尊大賢者得時善類交慶竊
以履百年熙洽之運雖章句之儒坐守而有餘當九重宵旰之憂則聖
哲之臣馳騫而不足惟時用舍寔繫安危故委重何啻于萬鈞而幾微
不容于一髮視已陳之迹則因陋就寡烏足以有為建非常之言則駭
眾驚愚亦難於慮始邦班君奇策尚謂平平耿耿大言猶為落落必盡
破拘攣之議乃大收閎濶之功恭惟僕射相公巖巖社稷之臣挺挺

東武劉氏嘉蔭後宋本校鈔

帝王之輔爰屬艱危之寄首膺攷謨之求深惟注意之隆實預扶衰之
義崧嶽周邦之翰獨專神柄之雄龜蒙魯國之專瞻益壯坤輿之重不
動聲氣斷大事於笑談之頃不作聰明運沉幾于禍福之先稽古道而
思有宜于今合眾謀而不必出諸己茲謂中興之佐寔為後事之師某
頃備省曹嘗參文柄窺絕足於羣龍之廐仰高明于千佛之經願畿疆
有百舍之遙詎門墻無一日之雅側聆誕告益竦遐瞻屏迹窮閭願莫
下望塵之拜馳書東閣尚能脩事天之恭

賀蔣丞相啟

洪景伯

伏審嗣聖簡求真儒柄用官不必備久當機務之煩人皆曰賢遂正鼎
司之重仍併顯于宥密實盡付於經綸朝野具瞻華夷允賴竊以思民
被堯舜之澤伊尹自任而不辭願我為管晏之功孟子當路而必耻惟
輔相規摹之既大則朝廷氣象之一新恭惟僕射樞密相公學擅儒
宗才推王佐入踐鑾坡而素優於潤色首陪巖廟而備極于贊襄如崔
相之除吏負既公荐舉若丙吉之按邊瑣亦預料條果登正於宰司用

增光於祖烈况十事說天子早已見於責難則一代為宗臣即遂聞于
專美某述聆宣制猥紳乘輅阻陪賓客之趨曷勝寤寐之喜其如辭納
訥莫盡意誠

賀朱丞相啓

張全真

伏審大廷敷號舊弼登庸宿望昭宣慰蒼生之傾屬同心頌戴扶黃屋
以尊安中外惟愉華夷警服竊以九里旰食軫國步之迍邐四海究心
歎人謀之回適急于赴功則攘臂以事兵力膠於應變則拱手以頌天
時類失厥中无益於治宜得魁壘豪傑之士以為經綸康濟之圖人固
患于難知政莫先于任舊恭惟 某官學窮道粵識探幾先德度恢宏
撓汪之坡而不濁才猷敏達游恢之丑而有餘曩警蹕之時廻倚
鈞衡而爰立一德始熙於帝載元兇遽亂於國經八柱承天即正高明
之位五龍夾日灼知潛授之功扶顛譚咲之餘遠引江湖之上謗書一
篋何傷丹扆之深知細札十行旋趣鋒車之入覲迹英畫訪宣室夜前
衮衣繡裳既喜歸於姬旦命圭相印復加禮於裴公固應展畫于遠猶

東武劉氏嘉蔭後宋本校鈔

豈復規圖於近效格民積粟以固基本詎專兵力之強嘗胆枕戈以修
政刑亦戒天時之泥將見運籌帷幄以決勝于千里端委廟堂以為準
於百僚沃心清燕之間拭目中興之盛某頃陞于從索嘗蒙委薦之私
比解藩符復忝交承之契仰止熒煌之座稱慶元階蕭然衰病之蹤依
歸有所祇聞新命喜倍常情

賀右丞相啓

蒲大受

伏審中頒紫詔載陟黃扉登用舊人交脩庶政維帝攸賚寔民所瞻固
有懽聲徧及率土恭惟 某官望隆柱石明照著龜以博通應變之才
躋侍從于神考作新之日以夷險不回之操參弼諧於泰陵紹述之時
出入三朝裁成百度歆踐繼志之實思聞補衮之言乃自江湖歸參帷
幄尚謂密資於啓沃不若顯置於廟堂果敷綸言克協衆聽君陳申命
固多告后之猷千秋既封必有富民之効某受知最久被德已深復以
遲暮之年再託陶鈞之地適居待竹阻造門闌不勝燕雀賀履之心竊
有犬馬戀軒之志喜深載躍望極增馳

賀右丞相啟

周行可

聿膺顯制進拜懋官伏惟慶慰恭以 某官碩德渾剛忠誠隱厚氣節
堅乎金石功名著于鼎彝決應變之機上所敬憚講順派之法民以乂
寧江河疏道德之恩藻大明帝王之制邁我一德為時顯猷考諸朝野
而有成功謀之士夫而無異論是推茂典以答元勳巖扉靚深袞服炳
蔚式示具瞻之美足昭爰立之光某夙隸陶鎔遠聆贊拜更甚迹展慶
有時踴躍懦衷倍萬常品

賀丞相兼樞密使啟

毛伯穎

冕旒發悟須浹汗於九門袞綉來歸總樞于二府協朝會之素望壯邊
瑣之威謀用君子為邦家之基進善人得天地之紀璽書誕告于頌交
欣竊以乘龍御天聖主比隆于光武如魚有水元臣訂美於孔明昭然
信順之符威矣明良之會昔虜騎襲淮壖之後屬鑿輿巡浙右之初封
豕長蛇肆毒尚憑於牧圍城狐社鼠嘯凶忽起于蕭牆天步艱難人情
睥睨強藩巨鎮莫敢誰何故老元臣更相歎息相公建義旂而紂合揮

東武劉氏嘉蔭後宋本校鈔

憤笏以激昂首倡大謀畫夷醜廓清氣稜再垂日月之光膺受寵榮大
啟山河之士誓方且念荆吳之形勢願秦蜀之上游身踐戎行豈憚櫛
風而沐雨心存王室每懷就日以望雲暴露五年憂勤一節流言起于
二叔愈見周公之忠年貌問於四夷難掩裴度之用果膺綸命再踐鼎
司舊壁壘而舊鼓旗得臨淮而增重錫弓矢而錫斧鉞褒踐土以加優
不日而成為天所贊恭惟 某官柔惠且直昭明有融學窮百氏之淵
源文貫六經之矩矱含章以從王事許身無愧於伊周達可之謂天民
致主每期于堯舜議論必稽于皇極經綸悉本于帝謨致廣大而盡精
微獨造真儒之効總方略而一統類乃凝哲輔之勲茲大用於巖廊遂
永清於海寓糾逃王慝既正藁街之誅誕將天威遂通榆塞之阻戡夷
多難耆定中區告九廟之神靈還兩宮之警衛龍樓問寢畫三朝孝養
之歡鳳輦還都受四海貢輸之富增煥雲臺之象遂陪日觀之封赫然
近古以來未若我公之懿某周旋頗舊林勇寔深桑榆雖迫於頽齡燕
雀願棲於巨蔭彈冠結綬尚陪光範之簪裾抱槩懷鉉庶幾文昌之

札

賀丞相兼樞使啓

方雲翼

顯膺茂冊兼領鴻樞冕旒之眷寵深隆簪紱之覲瞻益竦聲傳飛驛喜
決遐陬竊以三公之尊政無不統二府之設職乃有分秉國鈞則務在
平章處機庭則獨司宥密且文事武備之必有固宜合軍國于一權苟
出將入相之可為孰若注安危之兩意恭惟 僕射樞使相公天降大
任道得正傳聳巖石而慰四海之瞻運洪鈞而為萬物之播汝作舟楫
汝作霖雨兩顧所用之如何視若手足而視若腹心本相須而无間以人
主之職而論乎一相而天下之手在于四夷將資制敵之能復畀本兵
之重運籌決勝高祖謂不如張良惟斷成功憲宗乃能用裴度中興可
待遠業攸歸某辱在下風欣聞成命屬處南州之地遠陪東閣之趨且
桃李无言緬想成蹊之舊燕雀至賤敢忘賀慶之情

賀吳樞使啓

汪彥章

光膺冊命進陟樞庭謀若著龜投千載功名之會如心金石為兩朝社
稷之臣當日月之繼明乘風雲而特起國須賢立天為時生於以 某

東武劉氏嘉蔭錄宋本校鈔

官厚德鎮浮英材經遠以天地浩然之氣潛養於中以古今作者之文
悉臻其表爰自踐揚之始每勤納獻之忠立朝未反於中年舉世推為
於舊德昨屬殊鄰之擾上貽當宁之憂夕烽既徹于甘泉清蹕將遊于
汾水唯公夙夜與國存亡由侍從之周行決纂承之大計方獨處雷霆
之下有難言父子之間雖黃屋非帝堯之心固宜及此然逆鱗在神龍
之頷誰敢嬰之非二三祕策之前陳使百萬精兵而奚益宜彼軍之喪
氣知吾國之有人委曲請盟遠廵退舍九重根本得英公賢于長城四
海生靈微管仲吾其左衽方主上清明之今日實邦家希濶之昌期歆
衆賢同建于事功非雅望孰為於師表將萬世維持之是賴何一時康
濟之足言云

賀韓樞使啓

汪彥章

光膺詔冊進陟機廷既廊廟之得人知朝廷之能國恭惟 某官清名
籍甚雅望歸然四世五公門閥獨高於天下十事九律計謀有補於國
家徧揚清近之班深結聖神之眷徇翔滋久僉屬寔勞惟豪傑之士無

待而興難稽經濟况公侯之家必復其始果被東求某早辱誤知欣聞
休命屬拘孿於印綬阻趨造于門墻暑令清微政塗豐暇莫謹鼎茵之
節永為宗社之休

賀呂樞使啟

歐陽永叔

顯膺寵典登進樞廷成命始行輿言發允伏惟 某官存誠直諫踏道
中和學臻三代之英世濟八人之美論思獻納已多補益之勤謨明弼
諧久韞經綸之業三朝春遇一德老成尚虛黃閣之居姑止紫樞之位
坐籌帷幄方資剌勝之謀正席鈞台始慰具瞻之望願惟衰朽早辱知
憐維與蒼黔同深慶抃

賀王樞使啟

熊子復

伏審浹揚大冊晉擢真儒二柄對持極隆祿於宥府萬樞獨運助英斷
於嚴宸廟算一新郵傳四出竊以聖常求于該輔時罕建於元樞慶歷
之左或統以圖功則必得杜正獻之矯亢皇祐之弼方權以濟務則亦
有龐莊敏之鎮浮如洪河春漲而砥柱不搖若碧漢夜闌而長庚有爛

東武劉氏嘉隆錄宋本校鈔

皆止機廷之使號旋更宰路之官儀我思古人復見今日恭惟 樞使
相公挺生曠代特立清朝渾々無涯道極聖涯之遠堂々不撓才充邦
棟之隆方游華禁則特達而徑遷及處峻廊則周旋而徧列樞機周密
既亮采而日嚴輔贊弥維每含章而時發氣塞兩儀而直養元害知周
庶彙而曲成不遺姑首贊於籌帷即平遷于揆席某早窺崇仰晚托洪
鈞固知弗為管晏之功將盡行於所學况已屢陳堯舜之道尚親見于
此時

賀虞樞使啟

耿元鼎

伏審貂璫趣道歷坤維萬里之長袞繡還朝陟乾道元樞之貴眷威名
之特盛加禮貌以惟隆斷由當宁之心喜動在廷之色邊陲加肅廟社
增榮窃以九德知人莫難乎三事大夫之選五岳摠務尤重夫六鄉司
馬之權必其挹經緯之全才乃可注安危之兩意况人主職論一相于
以簡當軸之賢而天子守在四夷所覲獲偃戈之慶苟非宿望曷副疇
咨僉言我公傑立當世諒惟驩慰恭以 樞使相公先生勳高一代名

震萬方容止可觀所謂大臣者謀猷必告豈曰小補哉洵湯英雋之躔
自結顛昂之騰取武臣二三策志清中原得結輩十數公天降大任擢
自詞林之妙參陪法從之華督府揮犀嘆夷吾于江左留都典鑰仰蕭
相於闕中丹青旋憶於老臣閭閻再朝于黃道至每為絳侯而目送謂
不得臯陶為已憂方忻要路之登已遂急流之退重輕所繫難稽謝傳
於東山安否何如即訪裴公於西維台從綠野趨拜洪樞既夙夜以在
公亦朝夕而納誨漢高決勝千里獨子房參帷幄之謀舜帝有臣五人
惟伯禹荷股肱之託嗣聽絲言之出會觀鼎足之承永慰具瞻共觀爰
立某早登崇佞竊拜下風列屬憲台聿密承於警欵備負帥幕更叨被
於陶銘當盛事之播聞欲中宵而起舞凡肯念當家之鼠不隨雞犬以
昇天後時慚失旦之鷄方効燕雀之賀履其如欣悚莫究敷陳

賀虞樞使啓

馬子清

伏審上心圖舊中詔疏恩趣駕鋒車擢冠樞省豐才裕國不茲在乎偃
草安邊自今姑矣恭惟 某官千齡間出一旦親逢富貴初非本心功

東武劉氏嘉陰後宋本校鈔

名蓋其餘事明白洞達濁涇貫清濁不可涇而緇碩大剛方長劔倚太
行不待扶而直疊書屢及門而躊躇四顧使輅促就道而俯樓三辭道
之將興坎當仁不讓天之未喪也舍我其誰勉應側席之求亟正元樞
之拜大安國步護諸將於爪牙之雄遠愓王靈制百蠻為股掌之玩某
空嗟大耋莫睹高明比貢蕪治辭獨蒙褒借側聆誕告尤激懼悚東閣
加招願已孤于榮願南山高仰猶獲預於遐瞻欣抃之私占陳曷究

賀王樞密使啓

馬子才

誕告明廷延登近弼運籌決勝久分疆場之憂當軸處中遂正廟堂之
位折衝雖舊注意惟新恭以 某官稟氣雄剛受材英特任心膂爪牙
之寄積旂常鼎鼎之勳惟文武以兼資故君臣而默契昨屬羽書之急
親煩幕府之行軍容一陳士氣百倍殄萬里憑陵之寇安兩淮震擾之
民累歲賢勞蟻虱幾生於甲冑一朝醲賞貂蟬果出於兜鍪某早託餘
光忻聞異數偶左府之拘綴阻東閣之進趨暑令方新政塗多暇冀謹
寢饗之節用承旒辰之休

賀徐樞使啟

李粹伯

光膺寵命入秉鴻樞廊廟自高有人豪之在位播紳相語喜君子之得時某官學道通天人氣阻金石議論文章動臻乎意表死生禍福不入於胸中兒曹知白日之清明學者愧介邱之迤邐帝于裴度寄天下之安危人以謝安卜國家之隆替果陪光輔實久具瞻某又辱誤知忻聞休命屬守符之拘綴阻賓閱之進趨詠頌徒深敷其罔既

賀秦樞使啟

汪彥章

顯膺綸綍進陟機廷唯賢哲之奮庸實廟堂之增重庇庥所逮鼓舞攸均竊以北斗冠乎樞躔垂諸天象夏官搃乎兵政著彼國經當公朝閑暇之辰居右府近密之地仰禔至治允屬英髦恭惟某官智畧淵深神丰嶽聳瑞聖時而間出鍾賢運以挺生較藝棘園素號人中之傑標名桂籍果先天下之儒爰簡清衷亟躋華貫掌書祕府典禮奉常翰苑揮毫妙極辭章之選邇英進讀益加駉貌之隆繫經綸之宏才宜文武之兼用延登帷幄式贊鈞衡方君臣慶千載之期而父子有同時之遇

東武劉氏嘉蔭移宋本校鈔

誠為盛事夙絕前聞某側聽郵音限居官守想熒煌之座徒劇觀瞻託坎北之鈞愈深踴躍永言頌詠曷罄編摩

賀王樞使啟

王介甫

璇璣上列齊七政以均和常袞輔成欽四鄰之基命親逢華旦允屬宗工恭惟某官與國忠純爽邦明哲對越光華之旦居然文雅之宗簡在上心鬱為時棟雍容禁樞嘗密贊於睿謀參貳宰司多委陳於治軌奮庸甚盛注意特隆屬恩詔之誕頒分鎮臨之重寄居留神甸為表則於四方寵進樞庭當折衝于萬里聲教所暨慶抃率同某俯念空疎夙叨存記縮縣而章祗役望君幄以勞懷共聽吉音以豈勝至願

賀富樞使啟

毛伯穎

伏審進圖舊德入正洪樞威動殊方慶交多士恭以某官智周事表覺動民先卷舒兼文武之謀猷出處格古今之事業盡性之學濬游夏之淵源致主之功軼夔龍之軌躅諂譏並起而不失乎正夷險薦更而愈見其賢名自江湖進陪軒陛仰迪光明之學畧資弼亮之謨與其置

諸勸講帷幄之間曷若登於折衝廟朝之上具瞻攸在睿眷弗違有韓
棟華並調金鼎紹八元之逸駕冠二府于同時蓋惟不世之異人宜錫
非常之殊寵益隆勲德永載彝常某猥以頑冥夙叨知遇沈疴疲薊方
甘蓬艾之窮居顯渥便蕃增賁桑榆之暮景悵門墻之阻遠跼鑒寢以
勞忽聽召除果無與頌奮起已疲之力願効指蹤圖惟未報之恩更期
畢命永言欣幸寔陪等夷

賀吳樞使啓

葛魯卿

恩沛中辰榮登西府朝廷增重寰宇文驩竊惟宥宥之司實領機微之
務總理軍務緝熙帝猷鑿斗運而當樞佐天事而尚武中資廟算外擢
王靈宜得真儒來副異選非有經綸之望曷膺寐寤之求恭惟 某官
性稟誠明學該微妙言為邦之興替身任道之污隆文章百世之宗師
風采三朝之元老千齡際運為堯舜之君臣一體同榮陋機雲之兄弟
優承睿眷密贊兵機即展秘于龍韜自收勳於麟閣勢依永于柱石民
心方庇於陶鎔暫執鴻樞即居元宰某限拘文禁莫展慶儀徒掃舍人

東武劉氏嘉蔭後宋本校鈔

之門阻侍先生之席心同燕賀仰窺大厦之成志於躍金正倚洪鑪之
造其為抃詠實陪等夷

聖宋名賢五百家播芳大全文粹卷二十四終

聖宋名賢五百家播芳大全文粹卷二十五

賀啓

賀沈參政啓

汪彥章



光膺書贊入秉事樞朝廷無謀國之疑天下有得人之慶音郵四
達風采一新恭以 某官碩學造微高文行遠房喬警敏安危炯
炯於胷中劉向精忠邪正惓惓於筆下暫付維揚之治俄深宣室
之思連趣鋒車遽參魁柄儒術果康於經濟善人斯得於統盟復
七世祖宗之基國須賢立極一時人物之選公為時生某久辱眷
知欣聞登用均茵憑之末尚託他年在陶冶之中敢忘今日歲律
晚晚巖廊靖深願為宗社以自持常有神明之來相

賀李參政啓

張全真

伏審顯奉制函榮躋政路正人登用固知道之將行善類傳聞殆
欲喜而不寐恭惟慶慰伏以 參政議高而慮審學博而造微納
忠不暇於謀身嫉惡蓋由於稟性鑿錘烈焰莫推百煉之剛霜雪

沍寒不改後凋之操堂堂侍從之老赫赫蕃宣之勲凜難進之高
風鬱具瞻之輿論公道既闢天意乃回汲黯於漢庭淮南自定見
夷吾於晉室江左何憂究觀宏規灼見興運惟是上增隆於主德
下博採於真才內銷姦欺朋比之餘外戢跋扈飛揚之漸裁抑奔
競督責苟媮凡此數條諒闕深念某支離病骨臃腫弃才謬託交
承之私終虞責任之重蒙成矩矱固無假於施為佚老江湖政有
資於造化餘寒未艾機務方繁益調首鼎之宜佇正鈞衡之任區
區欣頌實倍等夷

賀翟參政啓

張文饒

伏審顯頌詔綉榮貳政幾真賢奮庸寰海蒙福恭惟慶慰伏以
某官神姿英偉識量清夷學推四海之宗工德茂三朝之元老再
掛冠於神武尤高難繼之風兩待詔於金鑾卒賴持顛之略遂由
公望入踐政塗論說無疑沛若巨魚之縱壑姦邪不起凜如猛獸
之在山坐制天驕允資人傑亟贊元於鼎鉉矧紀績於旂常某蕭

東武劉氏嘉蔭錄宋本校鈔

然衰蹤託此巨陰念備員於高密實陪賓客之餘茲假守於會稽
獲奉教條之舊未貽吏議殆匪人謀除目播於邇遐驩心陪於夷
等計安宗社側聞帷幄之籌佚老山林終借齒牙之論屬拘符竹
阻造賓闕

賀曾參政啓

王弱翁

光膺制綉參秉政機帝曰往哉文武為萬邦之憲天其或者太平
當今日之期郵音四傳輿頌交慶恭惟 某官博大而氣正浚明
而識高宗論欲議鏗鉤乎闕庭雄篇天冊橫絕乎今古銀臺三昧
聳廊廟之高風金帶萬釘映山川之秀氣攘袂徇國秉羽投兵裴
度躬往視師遂決淮西之勝謝安晏息清冠果收淝水之功識乙
陞之履聲付上流之閫制肆從圭覲益峻巖瞻精神折千里之衝
兢業贊萬機之務有如眷注爰契疇咨惟茲四人共迪文王之彝
教式是百辟要觀山甫之令儀某內愧迂疎仰崇知遇乞漿得酒
適幸際於豐年點礫成金實全資於良藥逖聞異數喜倍常倫陳

泰階之六符莫親光耀轉洪鈞之一氣終賴陶成夏律清和政塗
間暇願謹鼎茵之節永為宗社之休

賀楊參政啓

洪景伯

伏審延登帝賚參秉國均大老既歸天下安往有德是進朝廷益
尊休聲不約而皆同和氣非召而自至惟皇家之建輔自乾德之
裁儀共領朝班纔差丞相之一等通釐省務非特尚書之萬機雖
天政之咨未嘗乏其人然真儒之用或有愧於古必成千一之遇
如伊尹萊朱見而知焉庶幾五三之隆雖管仲晏子不足為也恭
惟參政心潛百聖氣塞二儀學者仰如泰山早擢南宮之首蒼
生望為霖雨久期西蜀之來屬親攬於政機亟進聯於法從佩龍
淵之錫既引上於星辰演鼇禁之綸更助為於雲漢上方慕仁者
交鄰而得湯文之道戒功臣任職而全寇鄧之勲內彊百世之本
支外定四方之綱紀匪資耆德孰贊睿謨果躋寅亮之聯用究弼
諧之業如范丹陽權大謀於慶歷之際若王臨川持高論於熙寧

東武劉氏嘉蔭後宋本校鈔

之初已素協於巖瞻宜即膺於柄用某逖將使指竦聽制音但竊
欣於得輿莫趨慶於成廈願契沉幾之運益恢遠馭之圖

賀洪參政啓代

熊子復

伏審簡隆嗣聖序陟宗工冢席方虛宜總廟堂之議邊烽既息併
顛帷幄之謀播告遐邇聳動觀聽竊以弥綸大政一日至於萬機
體貌近司四岳均於百揆或偶虛於衮職則獨決於廟謨是故韓
安國長烏府而行丞相之權郭待舉貳鸞臺而典中書之務參稽
故實委任真賢恭惟參政樞密知院驚代鍾才際天蘊識學通
流略而洞窺萬古文類盤詰而勒成一家蚤擢異科薦敷華貫膺
堯舜父子之眷如彼其專較伊呂伯仲之優於斯為盛鼇禁久資
於視草鴻樞更藉於運籌果副民瞻進參國秉使已通於沙漠盜
既掃於潢池清廟告功盡出真儒之略正衙宣制佇登元宰之班
某猥冒使華尚需官次進聞成命喜陶冶之方新退省孤蹤覺忤
幪之有託

賀陳參政啓

孫逢辰

伏審誕膺顯冊進服迹僚帝賚良弼而挺生王佐之才天降大任而參秉國成之重茲一德明良之會實千齡旦暮之逢恭惟某官學洞天人精稜之原德合言行樞機之要踐揚茲久譽處深休肆疇論思潤色之工進陟經體贊元之任儀刑四海出納萬微丕闡帝圖大釐邦采迨茲朞月興王者不世之仁奚俟百年著善人為邦之効某門墻舊物畎畝餘生猥當三省起廢之初嘗玷一諾游談之助逖聞休命爵躍固異常人之情竊仰高風鳧趨莫陪下士之列

賀蔣參政啓

孫逢辰

伏審祇奉璽書進司國柄方賢路逢辰之日政聖心籲俊之初揆群策以圖勲大張天步進真儒之置輔卓冠臣宗恭惟某官七葉忠孝之門四科文學之士一朝獨步兩禁先登體聖人之清而使貪夫廉秉君子之剛而使狂者直先被贊元之舉具宣扶世之

東武劉氏嘉蔭錄本校鈔

猷自古稱君臣千載遇合之難於今見祖孫五記蟬聯之盛近繼元符樞筦三事之列遠追東京山亭萬戶之封恭惟馬氏白眉之良行踐王公黑頭之拜如某者年歲遲暮名迹湮淪同鄉社纔數舍之遙在門墻無半面之素繫巨川之舟楫何所不容而夏屋之旃幪固無弗獲側聆誕告尤激歡悰曳鄒行之裾無因至前著祖逖之鞭忽焉在後其為抃躍罔罄占陳

賀王參政啓

林子卿

顯對廷揚登陪國論旒纛益勤於簡注簪裾聳企於儀刑勢在本朝威宣遐域恭惟某官斯文所在以道而鳴蘊誠明之學而本乎中庸探經綸之志而見於事業真儒無與其敵岷然在諸公之前天子盡用其言擢之寘七人之上薦紆密睭進副師謀惟其當君子大有為之時必能辨羣臣不可及之事師尹赫赫已具隆巖石之瞻齊人章章將盡歸侵疆之舊倚席鈞衡之寵懋成彛鼎之勲某辱在下風遠從漕役令項與諸生之列故喜倍常人之情若

曰知音政流水高山之際如其造化在春風夏雨之中

賀蔣參政啓

晁子止

對揚宸綽榮貳政機進有德而朝廷尊姦邪敢侮得賢者而邦基立太平可期華夏罔不交驩士民率皆相賀竊以柄輔一象佐斗極以建時泰階六符應文昌而辨位仰瞻乾度俯驗人謀蓋將參造化於陶鈞贊彌綸於天地唐宗圖任登庸首命於魏公藝祖用賢遴選特先於居正矧宣王復古之際委吉甫作相之初易俗移風方冀修明於教化施仁發政力圖安靖於寰區以至理財用濟中興明黜陟以勵庶尹考禮足樂折獄明刑自非公選於賢良曷足參知於機務苟求羣彥果得巨人恭惟某官挾經文緯武之材負聳壑昂霄之志道德純備器宇端方玉樹瓊枝迥出風塵之表珠衡犀角允懷冰雪之清其高識遠見足以發明於斯人其博物洽聞足以考信於往古青雲得路搏九萬里之扶搖黑髮重金盛一千齡之際遇頃從近列浸歷華塗飛騰省闈之間參摠樞

東武劉氏嘉蔭篋宋本校鈔

機之要名既與身而俱顯德當偕位以兼隆遂簡上心亟參大政方覩絲綸之渙號已聞朝野之歸心竚正台衡即司槐鼎均調元氣永底丕平某跼促轅駒翱翔蓬翼頃幸同於官守常獲款於歡娛茲聞進拜之榮但切欣愉之至某偶拘郡紱阻造賓闕罔想一堂共慶風雲之會輒憑雙鯉聊伸燕雀之私

賀席參政啓

張全真

仰膺綸制入秉政機槐位久虛蓋簡求於宿望巖瞻既峻實大穆於師言欣圖任之得人知治安之有日竊以車馬自南巡之後廟堂深北顧之憂一人嘗膽而念寇讎羣公借箸而決成敗閱時滋久至計未聞欲陵厲中原而復土疆則敵勢尚強蓋懲車覆之戒欲逡巡江左而聽天命則國威日損或有陵夷之憂當守雖屢興嗟盈庭莫執其咎豈中興之業難以速於得志而非常之事未可輕以屬人故茲黃閣之開宜慰蒼生之望非時英傑孰副倚毗恭惟參政厚德鎮浮大猷經遠想累朝之故老緯有典刑閱當代

之名流蔚為領袖雍容禁從密勿忠嘉果膺黼辰之知擢贊鈞衡
之任方當協成長策宏濟多艱力王室而復神州少快茂弘之志
修政事而攘夷狄載賡山甫之章某比以病衰託於輝潤南臺冠
豸蚤欣草木臭味之同西省賜環尤見松柏歲寒之操辱知固久
歸老有期逖聞除命之頒切倍常情之喜

賀楊參政啓

張文饒

蔽自宸衷參持宰柄天降大任歷三朝而後興志在斯民委萬務
而不厭絲綸誕布廊廟增崇竊惟同以為和鄙夫昔以充位周而
不比賢者今以致君當乾剛獨斷之辰襲泰吉彙征之後羣枉絕
去大公顯行有若干陳十年而無咎庶幾丙魏一體以相成坐臻
休功可謂盛事恭惟 某官學關治忽道貫隆污蚤極羣書蔚為
多士之冠晚凝庶績雅屬萬民之瞻方退避於險微久自全於明
哲日月並照江湖來歸論思禁闥則諒直之志宣潤色皇猷則灑
噩之詞著當宁日以重器在廷仰其達尊果繇喉舌之司遂奉股

東武劉氏嘉蔭後宋本校鈔

肱之寄公權素行不數日以移風伯起家當四世而載德某濫
分外聞方託洪鈞簪橐同趨尚想金華之對措紳相慶莫陪沙路
之塵永言傾瞻實倍倫等

賀錢參政啓

伏審寵頒命冊褒進宗工陪鉉席之贊元官儀既正併機廷之經
武國勢增隆朝野交歡華夷咸賴竊以文武二柄並用惟久明良
一體相頌乃成方內穆於政經更外清於戎索苟非傑異曷副疇
咨恭惟 參政樞密知院曠代充才際天蘊識發縱指示嘗顯幕
府之權謨明弼諧方贊廟堂之畫師千所指騎塏俄清宜應泰階
之六符纔差丞相之一等昔天聖內翰竟不陞二府之聯而乾興
元樞未嘗預三省之政茲已光於先正矧即拜於上台由階而升
可供以俟某夙叨臨遣行即代還上策禦戎將見五兵之戢大鈞
播物尚霑四牡之來

賀王參政啓

熊子復

伏審輟營邊瑣擢贊廟謨長爭臣之七人久隆上春差丞相之一
等進繫民瞻體貌方新陞廉增重竊以河北甫定胡文烈遂參於
政機陝西略平龐莊敏亦貳於國秉茲本朝之盛事皆當代之偉
人經營雖見於長才論諫本聞於大節求之先正無若范公明道
立朝罄危言而悟主慶歷奉使攄妙略以禦戎及一朝寵進之崇
故四海恨用之晚曠古今而僅有邈前後以相望恭惟參政直
道儀朝廷猷經世夙被光堯之眷薦膺分陝之權班既列於從塗
簡益堅於嗣聖參華計省無錢穀之問至廟堂振藻詞林有書札
之文賜方國逮甄流品更摠銓曹旋陞正諫之聯出護安邊之師
內清朝序姦邪讒佞欺負皆已除外壯軍容障戎鎮守干戈果自
治亟垂睿想還翊化鈞方今使雖遣而威靈未宣敵尚窺而要領
未得雖和親征伐但歸兩科而輔贊弥縫要藏諸用願進顯於魁
柄用光啓於洪圖某猥戒輕輶阻趨崇仗仰窺勝算喜根本之既
彊退省孤蹤覺悒悒之有託

東武劉氏嘉蔭錄宋本校鈔

賀洪參政啓

鄭日丙

光奉制書進陪國論樞庭獨步方承晝日三接之光政路同寅已
動泰階六符之色人心闡懌海宇清明恭以某官靜和而粹夷
宏深而簡遠度量包世地負海涵道德照人日光玉潔爰膺妙柬
出應昌期正謀邊瑣之虞果預使羶之選深為國計帳三表五餌
之不施逆料虜情知十餅九漿之可下用權活法密贊沉幾大計
定而主聰不搖佳兵寢而民生自厚惟其純用詩書之力所以優
為道德之彊既得其人宜委以國稽治道之極致必在華夏蠻貊
之舉安考仕塗之甚榮罕見父子兄弟之迭起邊陲靜謐門宇煢
煌自非內百姓而外四夷何以身美名而君顯號旂常有紀天地
無窮某竊伏冗僚欣聞異數屬宣帝綜核庶政常憂稱職之未能
若周公阜成兆民願繼考工而有作

賀施參政啓

任子方

春求舊德允諧選衆之公參豫政機式賴同心之助側聞休命倍

集權保竊以六符位於泰階雖正公召之象四輔拱於北極亦分
政弼之司蓋機務之浩繁繫謀謨之協濟必有恢廓老成之士共
圖光明後偉之功用簡清衷宜歸雅望恭恭惟 某官道躋民業
總天常沉毅剛方有東都之氣節溫恭忠厚擅西漢之文章入踐
華聯益騰茂實摠銓衡之選授咸仰題評贊鈞軸之陶甄果諧登
進必將盡行其所學遂以大慰於斯民增貴昌期茂隆遠業某孤
蹤不振弱植無依假守縉雲曾賴吉新之益遡風蜀道欣聞圖舊
之良慶謁未遑瞻依再劇

賀葉知院啓

晁之道

伏審外奏膚功中疏顯渥乃眷樞機之元德夙資帷幄之深謀宜
腆褒章用光成績惟聖賢之會遇極簡策之尊榮慶動搢紳咸加
夷虜恭惟 樞密知院師表當世弼亮熙朝發揮孔孟之精微振
起臯夔之事業內昭王度百志所以惟熙外暢天聲九鼎為之增
重惟涇中之新境寶隴右之故封物產夥繁地居險阨武帝遂通

東武劉氏嘉蔭錄本校鈔

三十六國之遠素號喉襟充國請糴數百萬斛於茲可知沃壤歷
代守之以制虜名將繇是而折衝神考御天不忘恢復秦陵繼志
乃克綏懷紛異意以中更舉成功而外棄神蓄亡胡之憤人懷歸
漢之思載軫淵衷式資碩輔灼見萬全之策亟收一舉之功壺漿
在途牛馬布野歸實同於縱壑勢蓋易於建瓴用能旬月之間盡
復犬羊之衆近觀鄣虜已知係頸之期旁瞰夏巢無復游魂之計
再收妙略增貴昌期宜薦錫于寵光用益昭於賢業某夙蒙異寵
久負空殮乘障荷戈不預虎貔之列策勲飲至莫陪鴛鴦之群側
聽詔阻除修賓謁雖慙弱植倍極歡悰

賀胡參政除知院啓

恭審朝放顯冊位正元樞得君如彼其專既有以答諸大夫之望
在廷無出其右是宜峻居三執政之先國勢尊安戎心震疊恭惟
知院樞密相公發大道於不傳之妙振斯文於將墜之時泰山
喬嶽之尊挺然特立和風慶雲之瑞溫乎可知繇 壽皇特遺於

嗣皇自禁路亟登於政路精會神聚見於都俞吁咈之間謨明弼
諧藏其輔贊弥縫之用久疇咨於左轄遂升冠於右廷逆揣上
心實闕至慮與其差丞相之一等政機收修輔之功孰若幹天樞
之萬方道德有威強之效雖甲兵之問久已不至然疆場之事當
戒不虞有道而守四夷天子方恢於遠馭運籌而勝千里明公盍
繼於前良人所共期時亦易失蚤建非常之聞旋膺爰立之求某
十載門墻一麾江海託萬間之廣廈倍有歡欣搏一氣之洪鈞敢
希造命

賀汪知院啓代

熊子復

伏審趣還舊弼寵正元樞單于叩五原方舉衣裳之賜子房冠三
傑允顯帷幄之籌魁柄有歸巖廊增重竊以儒用真馬得削則制
挺可捷夫甲兵士變遭不知宜則解圍空舞夫千戚是故有富文
忠之遠略而契丹之和乃定有龐莊敏之長算而元昊之款遂堅
皆決勝於機廷繼登庸于揆席玩四夷猶兒戲爾曷敢不來想二

東武劉氏嘉蔭後宋本校鈔

公若聖人然詎容專美恭惟 樞密知院學闕百聖進契兩朝長
御史以視師夙定禦戎之策參天子而議政亟恢經世之圖中雖
迫于流言上愈隆于注意起思管籥兼蒙福于京師入覲冕旒果
基命于宥密既首本兵之重仍虛元宰之尊異域申盟聊用疆于
戎索正衙宣制佇遂秉於國鈞某猥使遠方喜聞新命帝王之興
建輔弼寔有賴于共工國家之暇明政刑要不忘于自治願弥縫
而藏用副垂拱而仰成

賀虞知院啓

宋仲山

伏審誕敷綸制入典樞機帷幄莫重於本兵謀謨必資於緯武威
加夷夏慶動搢紳恭惟 樞密知院器識光時才猷適變道德之
學洞照於幾微忠謹之風聳聞於朝野中罹讒謗旋陟遠巖居多
入告之嘉猷益挺不回之勁節果符輿頌進服巖廊深觀竒偉之
功增賁明昌之運某久塵委使素辱知憐

賀虞知院啓

洪景玉

伏審帝懷舊弼國拜元樞乾坤清夷久息干戈之役夙夜宥密首
當帷幄之籌播告邇遐疎動觀聽竊以交鄰有道本聖主之洪摹
制勝無形賴真儒之奇策矧是機廷之長寔均揆席之尊方嗣皇
獨運於朝綱非耆老孰專於廟算恭惟 樞密知院道闕百聖功
蓋兩朝持正論如執玉之堅斷大謀若轉圜之易即江中而破虜
勝謝元淝水之勲臨漢上以揔戎過羊祜岷山之績逮進陪於鈞
軸仍兼運於韜鈴果致要荒再尋明誓方具瞻於巖石俄勇退於
急流亟興丹宸之思復佐清朝之治暫本兵柄續成偃伯之休旋
秉國均茂建格天之業某猥乘軺傳逖望泰符茲聞成命之頒寔
陪常情之喜萬間廣廈幸已茂於旃幪一氣洪鈞願永陶於垓圉

賀富副樞啓

孫仲益

茂膺帝訓進貳樞庭既登奕世之賢蓋重本兵之地恭惟 某官
挺祖風烈為世英豪久隆佐國之謀實副象賢之意氣折強虜惟
先正茂鼎彝之勲志在安邦資沉幾運帷幄之識繼家聲之烜赫

東武劉氏嘉蔭後宋本校鈔

極國步艱於難是宜宥密一堂折衝千里王威敷暢永無內侮之
侵凌士氣激昂庶盡殊鄰之 擾某謬膺郡寄欣覩綸言三幅八
行曷罄書辭之悃九州四海用慶朝廷之尊

賀王副樞啓

孫仲益

伏審帝夢發祥上心虛竚誕膺顯冊進貳中樞竊以章句之儒類
優柔而不武介曹之士亦椎鈍而少文蓋藝之至不兩能惟天所
賦有偏得惟是文武憲邦之任實符宥密基命之求端委一堂折
衝萬里論兵投筆之後賦詩橫槊之間制挺捷強秦之兵請纓繫
單于之頸用宣威於道德式注意於安危恭惟 樞密躬不世出
之才佐大有為之治論詩書於馬上方草奏篇得頗收於禁中遂
司密命盡古今不可兼之美值聖賢所難遇之時廷號初傳巖瞻
惟允厥未形之難坐籌玉帳之奇建非常之功行佇衮衣之拜某
聞命而喜固異常情受知之深實契榮願致小夫羊贖之禮或以
為煩懷大臣教載之恩不能自已

賀鄧副樞啓

晁之道

伏審光被宸綸榮參樞柄聖神圖治痛宗社之多艱賢哲奮庸覺
朝廷之增重恭惟 某官天資高邁風度粹夷學擅名家極羣書
之浩博文高華國掩衆作之深醇蚤冠英躔薦更劇任嘉謀偉器
進當旒辰之知素履清名允協簪紳之論果膺妙簡遂贊洪機端
委廟堂而為準於百僚已歸重望運籌帷幄而決勝於千里此紀
殊勲某頃獲接於清規茲復依於巨蔭行借游談之助俾從佚老
之歸草木亦知威名會見折箠以制羗胡之命黍稷以供餘稅固
將擊壤以追田父之歌屬拘職於印章敢投誠於竿牘方隆倚注
益輔粹和

賀林副樞啓

范西叔

伏審顯拜宸恩參陪機柄惟是本兵之地必資同志之 凡與交
從尤深慰愜伏惟 某官秉心直諫毓質淵源學造古人之全名
收天下之重歷典藩要漸躋禁林選掄初自於先朝圖任益隆於

東武劉氏嘉蔭篋宋本校鈔

嗣聖矧中樞之宥密首近位之論思文武道同仰助璿璣之運雨
暘時若共臻玉燭之和某素接班聯久欽德誼不獨士林之屬望
固惟朝家之得賢驩欣之誠悃幅難叙

賀蔣副樞啓

唐子西

誕敷明命擢貳鴻樞世稔服於重名人共欣於顯拜恭惟 某官
才高康濟志切經綸文章秀發於妙齡器業養成於晚節中外薦
更之久所守益完縱橫應變之材無施不可出而頗收入則卿雲
先帝深知欲大用而未果嗣皇優眷遂圖仕而無疑召還自外而
歸直禁林曾未閱時而延登右府裁參機政寧收邦猷朝廷取決
於坐籌邊鄙折衝於燕俎君臣千載孰窺造膝之談冠帶百蠻行
見止戈之武某側聞除目阻遠鈞嚴莫申賀厦之私永愧登門之
舊

賀趙副樞啓

秦少游

光膺眷命進貳鴻樞伏惟慶慰恭以 某官器猷宏博學術精微

敏識照於未然奇節見於已試犯顏逆耳屢輸汲黯之忠別嫌明
疑力折董宏之妄進退周旋而可度艱難險阻而不渝俄被召以
旋歸遽干霄而直上粵自卿曹之貳進陪樞筦之崇卽音播騰士
論欣快亟聞趙武越四等以將上軍行見千秋以一言而取宰相
某叨分符節云

賀沈副樞啟

許次思

宸綸播命宥地登庸巖廟益尊增煥斗牛之野蠻夷震疊懽騰貌
席之師允泄茫庶孰不鼓舞某官才高經緯識造幾微傳聖人
之道而期於力行通當世之務以為於已任無虺蜥蟻子之援歷
鈞天帝所之遊貳事省聯制邦財於強富修辭史館納王法於婉
微成績炳然貴名籍甚以文武兼資之器會君臣一得之符爰進
貳於國樞遂密參於廟算方聖生大有為之日實上臣恢遠略之
秋必將衆建時髦兼收羣策指蹤諸將坐成第一之勲紀石燕然
共際半千之運即正金甌之拜永調玉燭之和某乘部無堪登門

東武劉氏嘉蔭後宋本校鈔

有舊馳心大厦莫攄燕雀之私投翼深林庶遂鷓鴣之許

賀陳同知啟

伏審輟總銓平擢躋樞近邊烽久息益恢宥密之圖宰府初開併
贊經綸之務郵傳四出廟論一新竊以帝王輔弼之臣要須並建
文武弛張之道允屬兼資方顯戎索之疆更貳國鈞之秉卓為異
數併授真賢恭惟樞密同知參政氣勁而量閎體冲而韻粹勝
登龍席甲四海之諸儒履上星辰冠六聯之常伯况長策蚤施於
邊瓊而遠圖密契於宸旒朝廷推德業之尊將師仰威名之重果
膺命冊進莞事樞筦有五臣伯益贊舞干之化漢用三傑子房專
籌帷之功屬綜核於羣工兼彌縫於庶政參百揆四岳之列既任
弼諧應三台六府之躔佇當燮理某叨居省闈獲備官寮茲承新
渥之除實倍羣情之喜仰窺妙算諒開闔之難名退省孤蹤覺幪
幪之有託

賀劉同知啟

伏審簡自九宸柄于二府摛文內禁久已預於密謀續武中樞進
遂當於大任郵傳四出廟算一新竊以舞干戚而解圍蓋无是理
籌帷幄而決勝必有當才矧參翊於神機宜妙疇於邦傑若章文
簡拜於景祐之際如吳正肅命於慶厯之間進皆自於鑿坡秀仍
鍾於建水雖今僅見振古罕聞恭惟 樞密同知道際兩朝功傳
三世得齧禁之頗收頃殿藩宣赴鳳沼之夔龍復躋華要果顯兵
柄遂陟政塗摠攬權綱事雖由於獨斷運動樞極時正賴於同寅
某幸託餘輝欣傳異渥道古今而譽盛德敢効私諛進英雋以彊
本朝願符眾望

賀林同知啓

劉子駒

伏審光膺制命榮贊樞庭凡被鈞陶率同鼓舞恭惟 某官嘉謀
經國粹行表時文章究六藝之淵源問望聳一朝之風采貫古問
學該今典常依日月之光華乘雲龍之亨會國是既定民瞻益深
果由喉舌之司進陟樞機之任綏禦每資於長算猷為豈屑於近

東武劉氏嘉蔭後宋本校鈔

功金石著勲彝常紀德聊居右府即踐中台某辱知己之既深輒
忘言而申序方棲仁蔭徒深燕賀之誠莫展慶儀不預鳧趨之列
載惟抃詠曷既敷宣

賀葉同知啓

孫正之

伏審對揚休命入秉事樞聖主御圖撫九五中興之運大賢命世
偕二三同德之臣廷渙甫傳巖瞻惟允恭惟樞密同知訏謨經遠
雅量鎮浮好直有叔向之言養氣得孟軻之勇嬰龍鱗而摩上獨
懷蹇蹇之忠冠豸角而觸邪詎作容容之計萬夫之望想聞於風
采一國之慕具載於歌謠果膺帝輔之求式受本兵之寄經術之
士進而名器重道德之威立而朝廷尊天子守四夷正樞筦運籌
之日人主論一相示鈞衡爰立之期某分違二紀之餘追惟一日
之雅側聆大用倍激懽悰繫四方人物之英舉欣欣起執鞭之慕
而一老門墻之舊已駸駸向頊壑之時俯深賀燕之私徒有羨魚
之歎

賀張同知啓

林豈塵

寵膺策制擢貳樞庭國之將興眷直臣之在位人惟求舊登元臣以壯猷四方傳聞九鼎增重恭惟某官擎天柱石許國蒼龜吾道以為指南斯文之所寄命備更天下之故自結人主之知頃登要津即契真宰會公孫方貴用事故長孺不得久留挺寒松之姿而晚操弥堅馥秋蘭之馨而久幽不改惟睿后闡簡賢之路而清朝無嫉能之臣起我公齟齬未合之中摠士夫鬱結不平之氣謂東宮之位宜早定尚何待周昌之爭以累朝之君不欲言遂固有魏譽之請雖咫尺被難旒之寵然毫釐輕軒冕之榮丹墀暫輟於咨諏琳館旋便於閒燕屬重明之麗正圖耆德以弼諧首煩留鑰之司遽下召環之賜運機軸而九重密贊坐帷幄而萬里折衝外朝衣冠覩絲論而相賀窮途麟甲失匕箸以自驚亟登泰階兩兩之符式慰維石巖巖之望某身縻遠嶠迹托洪鈞聆成命之載揚知中興之可俟德尊黃髮當遂策尚父之元勳身伴赤松未許學

東武劉氏嘉蔭後宋本校鈔

仁豐字號

留候之故事

聖宋名賢五百家播芳大全文粹卷二十五終

聖宋名賢五百家播芳大全文粹

卷二十五

十四

東武劉氏嘉蔭篋宋本校鈔





